

歸去來堂詩詞選

閩中李虛白撰

目錄

詩選

七律 鄂爾多斯紀行四章	9
七律 丁亥夏月閩中苦熱四章	10
七律 丁亥夏月苦熱又一章迭韻	12
七律 春雨	12
七律 丁亥春思二章	12
七律 丁亥感遇二章	13
感秋七絕九首	14
紅豆詩八絕句	16
五律 春夜二首	17
丙辰詠史二絕句	18
題畫絕句二十一首	19
辛未清明北行志感四絕句	23
癸酉北行三絕句	24
七律 為某老政客寫真	25
題畫雜詩五言十絕句	26

五律 丙戌歲暮賦得蘭花二首	28
七律 己丑題畫詩十二章	28
七律 己丑暮春懷感十二章	32
七律 己丑夏日八章	36
七律 己丑秋思三章	38
七律 己丑秋雁蕩山紀游八章	39
七律 己丑初冬南雁蕩山紀游八章	42
七律 己丑冬遊浙中壽仙谷二章	44
七律 己丑冬游浙中武義大紅岩山四章	45
七律 己丑冬遊金華雙龍洞公園二章	46
七律 己丑冬游金華赤松山二章	47
七律 己丑冬遊金華婺州公園	48
七律 己丑冬遊金華茶花公園	48
七律 己丑冬泰寧上清溪紀游二章	49
七律 己丑冬泰寧寨下大峽谷紀游二章	49
七律 己丑冬泰寧金湖紀游二章	50
七律 庚寅暮春隨筆六章	51
七律 庚寅題畫三章	53
七律 辛卯無題二章	54
七律 辛卯題畫雜詩十四章	55
四言題畫雜詩二十首	59

詞選

齊天樂 丙辰秋思	65
沁園春 甲子年倚聲于香江	65
木蘭花慢 六四百日祭	66
摸魚子 己巳三月，有感而賦。時旅次印尼椰嘉達	67
水龍吟 閩中平遠台晚眺	67
水龍吟 六四百日祭	68
夜遊宮四章	69
沁園春 述懷	71
沁園春 草堂寄遠	72
綠意三章	72
菩薩蠻八章	74
念奴嬌 壬申中秋	79
金縷曲 辛未重陽，時值辛亥革命八十周年紀念後五日	80
點絳脣二章	80
醉花陰二章	82
浪淘沙 春思	83
行香子 鄉心古意	84
沁園春 春望	84
多麗 閩中永泰天門山紀遊	85
傷春怨 二章	86
江南柳 無題三闋	87
南歌子 臨屏次韻暗香如沁	89
釵頭鳳	89

滿庭芳 題內子寫觀音畫像	90
蘭陵王 晚春憶別用白水韻	91
沁園春 丙子秋，移居加拿大有懷寄遠	92
沁園春 庚辰冬日自題江山晴雪圖	92
水龍吟 辛巳暮春 California Pebble Beach 賦感	93
鷓鴣天 戊寅春思十二章	94
臨江仙五章	98
臨江仙另二章	100
采桑子二章	102
南鄉子三章	103
浪淘沙 丙寅歲杪再赴南洋前一日作	105
蝶戀花 己巳寄遠八章	105
蝶戀花又二章	110
念奴嬌 以詞代柬寄劉友德	111
長亭怨慢 丙戌初冬自題雪天月夕中堂	112
百字令 丙戌歲暮加拿大西南安大略省初雪後有感而作	113
滿江紅 憶別	114
百字令 丙戌歲暮登 Gatineau Park 觀雪志感	114
蝶戀花 丙戌懷感八章	115
渡江雲 癸酉春思	120
青溪怨 戊辰春思	120
聲聲慢 為越南華裔難民蹈海事作	121
揚州慢 丁卯北歸賦感	122

高陽臺 庚申賦感	122
木蘭花慢二章	123
滿庭芳 遣懷，次韻二難先生	124
八聲甘州 丙戌和韻微雪齋主人二章	125
採桑子 春情，和韻秋靈	126
臨江仙 次韻江南雨	127
仄韻聲聲慢 秋心，次韻暗香如沁	128
沁園春 庚午春致十萬山人	128
漢宮春二章	129
鷓鴣天 無題	130
沁園春 以詞代序《青青故國山》畫冊	132
鷓鴣天 庚辰題畫六章	134
沁園春 一九八六年為挑戰者號七太空人同時殉難而作	134
滿庭芳 以詞代序兼柬漢雅軒主人	135
百字令 自題畫溪山圖十二章	135
念奴嬌 次韻冰君登臨滕王閣	143
百字令 次韻和陳靄文七疊	144
暗香 柳，次韻蒹葭蒼蒼	149
玉樓春 暮春懷感，四疊次韻十一樓	150
蝶戀花 暮春為題，步韻雲中化蝶	152
百字令 自題畫溪山圖，三疊次韻李凡	153
滿庭芳 次韻冰君詞長夢謫仙人吟	155
金縷曲 次韻朱八八，夏夜	156

揚州慢 初夏賦感	157
金縷曲 己丑冬遊婺州志感四章	157
水龍吟 己丑冬遊泰寧上清溪志感	161
綠意 己丑冬遊泰寧寨下大峽穀志感	161
哨遍 己丑冬游泰寧金湖志感，次韻湘弦絕響	162
哨遍 己丑歲暮賦感，再次韻湘弦絕響	163
瑞鶴仙 金湖赤壁	165
摸魚兒 福鼎太姥山紀遊	165
哨遍 己丑歲暮再賦感，三次韻湘弦絕響	166
賀新郎 己丑除夕，乘國泰班機橫渡太平洋上空超越子午線返加拿大志感	167
暗香 文成銅鈴山紀遊	168
疏影 文成 銅鈴山紀遊之二	169
南浦 文成百丈漈紀遊	170
摸魚兒 庚寅多倫多春雪懷感	170
鶯啼序 歸來，次韻湘弦絕響	171
金縷曲 庚寅元夕多倫多寄遠	172
翠樓吟 自題陽春白雪山水巨幀	173
鶯啼序 庚寅春日有所感而賦	174
金縷曲 庚寅春思七章	175
哨遍 庚寅仲春，遊美國 Middlebury Vermont Frog Hollow 瀑布歸賦	181
哨遍 疊前韻再賦遊美國 Middlebury Vermont	182
六醜 庚寅暮春無題之一	183
霓裳中序第一 庚寅暮春無題之二	184

八歸 庚寅暮春無題之三	184
角招 庚寅暮春無題之四	185
征招 庚寅暮春無題之五	186
宴清都 庚寅暮春無題之六	186
哨遍 庚寅初夏感賦	187
三姝媚 庚寅夏遊魁北克 Montmonency 大瀑布賦感	189
南浦 庚寅夏重遊千島湖	189
水龍吟 庚寅夏重遊加拿大千島湖再賦	190
西河 庚寅夏日 Quebec City 懷古	191
渡江雲 庚寅夏日 Saint Lawrance River 紀遊	191
沁園春 庚寅夏日渥太華懷古	192
大酺 庚寅渥太華紀遊	193
換巢鸞鳳 再賦庚寅渥太華紀遊	193
揚州慢 庚寅 Kingston 紀遊	194
瀟湘逢故人慢 題畫次韻越女鏡心	195
醉翁操 示內子	196
醉翁操 山居賦感	196
醉翁操 感悟	197
醉翁操 庚寅題畫	197
行香子 庚寅偶感十二章	197
醉落魄 庚寅短令隨筆之一	205
謁金門 庚寅短令隨筆之二	205
河傳 庚寅短令隨筆之三	206

夜遊宮 庚寅短令隨筆之四	206
梅花引 庚寅短令隨筆之五	207
河濱神 庚寅短令隨筆之六	207
雨中花令 賀鑄體 庚寅短令隨筆之七	207
夜行船 庚寅短令隨筆之八	208
傾杯令 庚寅短令隨筆之九	208
清平樂 庚寅短令隨筆之十	209
好事近 庚寅短令隨筆之十一	209
西江月 庚寅短令隨筆之十二	210
菩薩蠻 庚寅夏日雜感二章	210
沁園春 辛卯新春感賦四章	211
金縷曲 辛卯春思十二章	214
法曲獻仙音 次韻夢煙霏	223
紫萸香慢 朔北餞春，次韻夢煙霏	223
金縷曲 再次韻塵色依舊三章	224
醉翁操 奉題姑蘇雲鶴蘭花畫冊	227
蝶戀花 辛卯初夏感遇九章	227
摸魚兒 登紐芬蘭 St. John's 城 Signal Hill 賦感	232
金縷曲 辛卯初秋 Vermont 紀游五章	233

詩選

七律 鄂爾多斯紀行四章

一、

三月孤羈走內蒙，離離草綠過河東。
千年逝水興亡夢，萬里流沙曠蕩風。
金帳陣營殘照外，明駝行列晚煙中。
依然健翮翔平楚，不見胡兒挽大弓。

二、

疑泛支機石畔槎，春風駝騎聽琵琶。
疏煙落日人千里，碧草芳洲水一涯。
幾處穹廬歌敕勒，無邊朔漠響流沙。
山川寂歷干戈息，白髮歸來四海家。

三、

窮荒萬里苦寒鄉，一夜東風到白楊。
幕帳人家供乳酪，沙洲水草牧牛羊。
迢遙河漢星西轉，寥落音書雁北翔。
往日戰爭邊塞上，數聲笳響淚沾裳。

四、

川原騰蹕走縱橫，憑弔天驕獨此行。
金帳晚風春夢遠，鐵軍殘照古愁生。
離離碧草青陵闕，靄靄閑雲息戰爭。
中夜無邊來朔氣，猶聞動地馬蹄聲。

七律 丁亥夏月閏中苦熱四章

一、

當空炯炯熠驕陽，暑熱逼人來八方。
最憶憑軒風雪夜，相期歸櫂水雲鄉。
林泉高致秋心冷，枕簟清幽午夢長。
莫若覽書浮大白，解衣盤礴覺冰涼。

二、

鄉園歸夢尚瞢騰，暑氣連宵鼎鑊蒸。
繞廓繁車喧叱咄，當窗廣廈轟岡陵。
瓊樓玉宇途難達，朗月涼風意不勝。

此夕洛陽逢故友，憑誰重問玉壺冰。

三、

進退行藏歎兩難。炎天溽暑苦焦幹。

平居井渫浮瓜果，避地琴音詠蕙蘭。

最喜盈卮冰瑪瑙，更宜繞屋碧琅玕。

山中倘若來風雨，斗室當容抱膝安。

四、

海陸紛紜半沸騰，周遭暑氣鎮交蒸。

蹢躅始信蒼天老。積澱終教黍穀陵。

道路迷陽歌已矣，丘山薤露意難勝。

江湖此去多塵土，得遇夏蟲休語冰。

七律 丁亥夏月苦熱又一章疊韻

牛斗中宵紫氣騰，山城六月水雲蒸。

扁舟夜月邀蘇子，茅屋秋風仰杜陵。

孤雁南飛銀漢冷，大江東去古愁勝。

何如曠遠滄溟外，點滴心頭冬飲冰。

七律 春雨

微茫如織白雲浮，九派泉聲繞嶂流。
東峽溪橋斜映水，臨津野渡自橫舟。
江村晚汐歸鄉夢，客舍殘燈伴旅愁。
最是惱人聽不得，陰晴難準唱斑鳩。

七律 丁亥春思二章

一、

斜陽霽雨勸登樓，草木氤氳不肯秋。
爽氣滿天迎夜色，山青無數接江流。
篇詩再訂燈前約，杯酒同消劫後憂。
客子白頭歸故國，菰蒲淺水好盟鷗。

二、

紫靄當樓夕照遲，人間誰識虎頭癡？
綠楊留別堪題畫，紅豆相思莫賦詩。
飛瀑潺湲流碧髓，空山虛渺展春眉。
曾誇疏鑿丹青手，入夢靈機似舊時。

七律 丁亥感遇二章

一、

如礪蒼山翠幾重，行雲流夢逝無蹤。
為趨風雨三生約，來聽江湖五夜鐘。
仙掌承漿調玉露，蘭艘載酒采芙蓉。
兒時神識曾遊處，恍惚難名是某峰。

二、

夢中哀樂最難休，莫道杜康能解憂。
每值羈孤耽夜色，但憑風雨浣春愁。
扁舟涼月三千里，短笛清霜十二樓。
倘若息機觀逝水，故人心緒淡於秋。

感秋七絕九首

一、

五夜曾聽枕上鐘，小樓細雨憶青楓。
而今客地驚搖落，紅樹千山夕照中。

二、

斷腸不是落花時，霜木蕭珊感暮遲。
秋水荒溝思往事，可堪重見舊題詩。

三、

如海鄉愁入夢思，錚然一葉感秋時。
獨來萬里關山客，又上層樓強賦詩。

四、

繁蛩噉噉枕邊鳴，脫葉辭枝別有聲。
一縷秋魂招不得，何由長夜遣離情。

五、

銀漢紅牆夢已消，黃金白髮兩飄蕭。

西風老盡丹楓樹，無語斜陽立市橋。

六、

如梭日月苦相催，六代風流去不回。

若夢浮生悲草木，未緣歷劫亦成灰。

七、

月明星淡鵲南投，燕去鴻來故國秋。

千樹錦楓零落盡，回文詩就寄無由。

八、

詞客感秋雙淚沾，西風起處物華潛。

如年長夜相思苦，怕聽瀟瀟葉打簾。

九、

散綺殘霞九月紅，衰顏借酒照西風。

秋心片片隨流水，不入洛陽花譜中。

紅豆詩八絕句

一、

落花時節最相思，樹底盈盈雨滿枝。

自度新詞紅豆曲，傷春傷逝又傷離。

二、

親裁錦字璨珠璣，萬里投書送袷衣。

紅豆嵌成詩一句，花開並蒂燕雙飛。

三、

死生相許叩心扉，何物千年尚子遺。

誤種多情紅豆子，無端賦得九張機。

四、

紅豆明璫夢入幃，背人細數淚偷垂。

劉郎終隔蓬山遠，如此相思寄與誰。

五、

綺窗半閉月低窺，明燭雙燒淚暗垂。

夢罷青禽難寄語，春來紅豆發新枝。

六、

日上簾鉤懶畫眉，昨宵又賦落花詩。

垂楊可是相思樹？紅豆樓前舟不維。

七、

釵鈿花前約有期，曾拋紅豆過東籬。

而今春盡人空老，風雨樓臺歎式微。

八、

楚江魂夢笑心癡，紅豆新歌枉費詞。

緣物寫情聊寄意，人間何處不相思。

五律 春夜二首

一、

東君旋斗柄，暖氣動三陽。

月下山河靜，風中道路長。

浮雲歸故里，遊子在他鄉。

入夢梅花影，如潮湧四廂。

二、

北國臨新歲，情懷異故居。

和風新草色，殘雪映衣裾。

室內瓶花發，櫺邊月影虛。

一枕無痕夢，曾否到華胥？

丙辰詠史二絕句

一、

帝王公僕一身難，功罪何曾定蓋棺。

評略古今興廢事，從來禍國諉紅顏。

二、

仙洞風光入夢無，釣魚臺畔有啼烏。

朝中周勃今何在，六字真言誤托孤。

題畫絕句二十一首

一、

四山分綠到庭除，百丈飛泉下碧虛。
一自先生歸去後，白雲松菊是家居。

二、

暝色蒼茫漸上衣，物華寥落雁來稀。
先生自愛吾廬美，臥聽山泉百丈飛。

三、

誰家吹破梅花笛，歲暮懷人思永夕。
樓外霏霏雨雪寒，天涯最憶家山碧。

四、

投荒萬里鬢毛斑，意氣如雲未肯刪。
夢裡不知身是客，歸來獨對夕陽山。

五、

六月曾驚飛雪寒，神州西望夜闌珊。
雞鳴如晦愁風雨，水墨淋漓寫故山。

六、

丹楓寥落已秋遲，客夢鄉愁兩不期。
來歲花開如有約，青梅煮酒再論詩。

七、

青山如壁洞如門，流水桃花又一村。
只為漁人來問訊，畫圖重寫武陵源。

八、

擊碎珊瑚詠四愁，杜康難綴我心憂。
山中一夕聽風雨，始信人間六月秋。

九、

江南春盡百花蕪，山館徘徊太覺孤。
最是惱人聽不得，一簾疏雨叫鷓鴣。

十、

黑雲如幕閉重山，終古難忘六月寒。

心緒蒼茫無寫處，呼燈夜起拍闌杆。

十一、

舉頭何處望神州，野色微茫動暮愁。

一夕紛紛飛木葉，江山如此不勝秋。

十二、

雲煙嫋繞水環灣，此去蓬萊咫尺間。

幾日書窗閒筆墨，寫來夢裡數重山。

十三、

花落花開知幾春，桃源莫問武陵人。

濯纓何必滄浪水，是處青山可避秦。

十四、

聲聲鶗鴂叫簾櫳，又到清明穀雨風。

春水流春流不去，春山深處杜鵑紅。

十五、

三徑吾廬容膝安，悠然翹首見南山。

停雲賦罷無餘事，愛聽松風入座間。

十六、

蒼茫海色逼人寒，奇氣胸中起一山。

玉閣瓊樓盡時事，白雲來往古今間。

十七、

碧水涵山映夕暉，夢中曾聽海雲飛。

春來陌上花開矣，客子遠遊歸不歸？

十八、

間關鳥語入垂簾，草閣何人覺夢先。

午後蒼茫風雨外，半山斜照一溪煙。

十九、

故國河清豈可期，鄉情客思兩由之。

意中山色今何在，夢裡泉聲似舊時。

二十、

竹外幽居繞杜蘅，隔窗向晚聽倉庚。

翛然一枕華胥夢，漸覺四山風雨生。

二一、

玉宇飄瀟灑六花，憑傳春訊到天涯。

東風一夜南枝發，香滿柴門處士家。

辛未清明北行志感四絕句

一、

莫歎迷陽阻我行，海涯歸去始愁生。

湖山舉目皆王土，何處滄浪許濯纓。

二、

嶽崎磊塊酒難銷，孤館燈昏夜寂寥。

檢點猶餘英氣在，隔江來聽子胥潮。

三、

靈鷲峰前咫尺天，佛壇花雨自綿纖。

蓬瀛三淺須臾事，劫後重來二十年。

四、

暝色蒼茫對我孤，殊方怕聽子規呼。
清明不灑無家淚，且買扁舟下五湖。

癸酉北行三絕句

一、

重來真悔廿年遲，閱盡滄桑又一時。
何必扁舟尋範蠡，五湖無處不塵縈。

二、

海涯歸去始愁生，何處滄浪許濯纓。
煙水菰蒲成永憶，故山夢裡太崢嶸。

三、

排雲亭畔倚闌幹，闌寂孤心對夜寒。
最是難忘月如水，千山殘雪夢中看。

七律 為某老政客寫真

翻雲覆雨每狂談，袖裡乾坤幻綠藍。
奇計屢驚朝市出，大言未始此生慚。
果真本色能忘八，賴有傳人可返三。
還哂摩西矜自許，扶桑血脈費追探。

按：「返三」即「舉一隅返三隅」

又按：「扶桑血脈」指大和民族血統

附某君和詩一首

片言未阜益群談，尖刻無何調綠藍。
靖海歷時功化影，伏波轉瞬語成慚。
玲瓏有道難方八，詭譎誰人不窟三。
純種欲求惟納粹，年來原漢始能探。

題畫雜詩五言十絕句

一、

成敗競難休，色空原不異。

紛紛木葉秋，誰解飄零意。

二、

世事蒼茫外，人生寂寞中。

悲歡皆不著，無相入虛空。

三、

參禪猶指月，禮佛但觀心。

雲上流泉響，山僧入定深。

四、

朝市多興廢，繁華畢竟空。

山中無甲子，又見碧桃紅。

五、

好春當節令，短柬寄相知。

欲約雲生處，論詩月上時。

六、

一夜朔風起，江山雪意深。

青松有佳色，但恃歲寒心。

七、

饑堪餐白石，醉欲枕清流。

溪上桃花落，人間又幾秋？

八、

松籟滌塵心，泉聲怡倦耳。

雲煙驀地開，瞻彼南山美。

九、

吾家山水美，只住虛無裡。

物我兩相忘，止觀諳妙理。

十、

蒼茫海不瀾，無語對青山。

一道明泉落，天風響佩環。

五律 丙戌歲暮賦得蘭花二首

一、

花開幾時好，吾輩太心癡。

酬世多千慮，偏安只一枝。

情深難自了，歲暮欲何之。

雪擁關河白，憑窗有所思。

二、

我愛梅和蕙，情深嚮往之。

悠然吹玉笛，郁律記南枝。

關塞途難越，佳人夢可思。

撫膺曾自許，天地一詩癡。

七律 己丑題畫詩十二章

一、

冰紈八尺寫氤氳，罨畫丹青意不群。

賴有嵐霏澆壘塊，更從筆墨挹清芬。

深林夜積巴山雨，平野朝飛楚澤雲。

擬自空蒙求法相，一泓秋水最思君。

二、

三千丘壑列胸襟，筆陣縱橫醞釀深。
雄闊頗饒湖海氣，虛靈差可水雲心。
銅琶鐵板歌成詠，翠袖紅牙韻入琴。
祇有古愁言不得，滿川風雨勸登臨。

三、

營丘境界最清幽，禪榻爐香供臥遊。
曲岸垂楊堪系馬，疎林野渡自橫舟。
孤燈亭榭三春雨，落日關山一笛秋。
我欲因之觀六法，側身桑海幾沉浮。

四、

長堤新柳乍藏鴉。暝色春愁處士家。
妙想奇肱飛海嶽。平居甕牖話桑麻。
百年難醒南柯夢，終古誰浮北斗槎。
惆悵武陵人不見，門前溪水尚流花。

五、

葭管飛灰泮玉壺，清溪曲岸是吾廬。

茅堂斜立梅花瘦，竹檻低懸月影孤。
幽谷聆音知闌寂，空山留白悟虛無。
先生歸去心如水，不似浮雲出岫初。

六、

嶽崎棱角久磋磨，智井難期止水波。
亙古星辰終北極，百年羈旅幻南柯。
苦寒齧雪龍荒地，卻曲迷陽鳳歎歌。
此際解衣意磅礴，淋漓醉墨問如何？

七、

五月羊裘一釣竿，高蹤千古子陵灘。
祇因夜月耽佳色，每溯春江泛碧瀾。
攜酒來時無可問，乘風歸處不勝寒。
從來詩畫崇蕭瑟，豈遣春溫到筆端。

八、

紅塵咫尺是蓬萊，碧檻晶窗次第開。
萬里巡遊惟旦夕，百年登覽此樓臺。
幾枝紅豆情難舍，何處青山骨可埋？
秋颯冬寒俱入畫，風雲合遯八荒來。

九、

自度新詞韻最妍，奇章秀句集君前。
關河跋涉秦川樹，戎馬崎嶇庾嶺煙。
單枕閑憑如此夜，千秋長想異當年。
羚羊香象春無跡，水墨畫圖微雨天。

十、

窈窕峰巒白雪姿，前溪碧水夕陽時。
春寒誰訝梅花瘦，夜永方諳鶴夢遲。
縱有畫圖生旖旎，非關文字亦迷離。
米家山水誰能說，參化盈虛是本師。

十一、

江湖誰問歲寒盟，舊雨銷沉短笛聲。
鄉夢已隨秋月冷，歸心還共早潮生。
幾人洛浦曾留佩，何處滄浪許濯纓。
息機湛懷披畫卷，北軒抱膝聽倉庚。

十二、

燭炬重開枕上花，殘宵有夢夢還家。

蹉跎已誤藍橋約，偃蹇難通碧漢槎。
竹杖不妨憑獨往，蒲團差可結雙跏。
奈何竭澤菰蒲盡，莫趁春風過若耶。

七律 己丑暮春懷感十二章

一、

夜色朦朧浸水濤，闌干北斗轉春深。
扁舟碧海觚棱夢，古剎青燈梵唄音。
呵壁難忘三楚地；招魂猶憶九歌心。
停車豈效窮途哭，白首江湖是素襟。

二、

遍閱滄桑禮八靈，擁衾冷對小瑩屏。
天涯霧隱青山縟，心境波澄碧海寧。
一夕了知虛寂法，此生能幾短長亭。
起看十二欄杆外，河漢無聲隕大星。

次韻蓼青《七律問荀心犀》賦之

三、

燈火維園酹酒還，繽紛思慮費裁刪。
深林鬱勃山千疊，冷月叢殘水一灣。
問世遑論貓黑白，訪幽可聽鬼間關。
浮雲終古興亡事，六月冰霜亦等閒。

四、

北邙千塚昨誰郊？砧俎黔黎半醢肴。
財聚親朋先作俑，貓論黑白久成嘲。
薪傳燭火星光下。萍起靈飄蝶翅梢。
借問五陵諸俠少，干求六吉卜何爻？

五、

腹顏雪鬢鏡中誰？技止屠龍無一為。
薄酒欲沽遙市鎮，寒衣雖典蛀毛皮。
廁身塵海浮孤梗，直面雲崖入苦持。
甲子輪番悲笑事，雞蟲得失費嘲嗤。

用蓼青先生七律《我》韻

六、

遼鶴歸來海一方，青山華表幾斜陽。
盱眙無地非秦醉，膈臆何人是楚狂。
網路繽紛填綠壩，星途偃蹇憶紅牆。
燈光城廓迷茫甚，十億樓臺接大荒。

七、

逆旅百年飆似電，浮光飄瞥滄瀛淺。
曹騰幻化仰龍飛，隱約斑斕知豹變。
鴛枕清宵紫玉釵，雕欄永晝青苔院。
天涯有客夕無眠，起看朝曦殷一片。

八、

毵毵誰似長亭樹，何處扁舟桃葉渡？
心跡沉消不可尋，墨痕積澱無重數。
雲煙渾沌失遙岑，草色淒迷連遠浦。
中夜對床同一燈，來聽飄瓦三春雨。

九、

山河如夢風雷寂。九派茫茫迷禹跡。
柳翠枝頭欲化煙，海紅簾底橫吹笛。
闌杆直北斗牛懸，旦暮流東江漢碧。

倘若春風疾馬蹄，一朝觀盡長安奕。

十、

勘透盈虛參八定，東風又老靡蕪徑。

蔥蘢翡翠嶺千重，澄澈琉璃波萬頃。

闕下誰歌五噫詩，鏡中應見孤鸞影。

砉然一夕破禪關，人我乾坤俱究竟。

十一、

臨歧誰攬羲和轡？紅豆拋殘曾有悔。

省識機心豈海鷗，欲填瀚海惟精衛。

賦詩難抒彼時愁，傳罍不辭千日醉。

夢裡行人隔萬山，思君長似東流水。

十二、

暗室希微誰秉燭，遽然察見黃梁熟。

此時淡素食無魚，何處深幽居有竹。

漱灩波明碧海珠，晶瑩煙冷藍田玉。

詩心亦可證華嚴，億萬須彌歸一粟。

七律 己丑夏日八章

一、

嫩寒風緩麥秋天，故國江山六十年。
夢軟清宵慵化蝶，日熙卓午倦聽蟬。
何來妙手開碁局，難得空音辦指弦。
想望霓虹縹緲處，明泉如瀉玉如煙。

二、

碧水泱泱迴古台，小姑居處絕塵埃。
嵐光呼吸鬚眉綠，爽氣氤氲洞府開。
難越紅牆連廣漠，但教青鳥到蓬萊。
何如六合三千外，返照靈山聽蛰雷。

三、

千仞高崗欲卜廬，百年悲笑入虛無。
懷人風雨停雲賦，吊古江山潑墨圖。
鬱勃潤泉流玉髓，清涼意緒在冰壺。
觀瀾生怕魚龍怒，此夕臨淵不敢呼。

四、

年逾耳順此身閑，海水天風自往還。
縹緲沉雲歸遠浦，紛紜掛雨系空山。
憑虛坐忘三心外，離相徜徉五蘊間。
似綺殘霞西日下，疏鐘幾杵到禪關。

五、

夏雲流宕有無中，歸去誅茅海嶠東。
孤榻近窗親夜月，素琴掛壁拂天風。
一簾冷韻琅玕碧，十里溫馨菡萏紅。
劣軀振衣舒脇臆，凌虛長嘯入鴻蒙。

六、

藏舟幽壑意何如？芥子須彌話子虛。
蕉下莫名誰夢鹿，濠間焉辨我非魚。
橫磯垂釣清江艇，擊缶微吟陋室居。
自許天心渾沌甚，奇肱妙想馭飛車。

七、

蕭閑一枕黑甜眠，最喜輕陰小暑天。
玉貯冰壺三酌酒，瓜浮井渫幾文錢

清輝北斗回銀漢，廣樂南熏奏錦筵。
倘若風雷來海上，蕉軒觀雨碧無邊。

八、

北軒抱膝興翛然，聞蟬永晝寂不言。
花過荼蘼春信老，夢回雞塞午鐘傳。
清涼幾榻明無垢。勃郁林泉綠滿川。
最喜蕭條風雨夕，錦箏彈指玉潺湲。

七律 己丑秋思三章

一、

西風此夕動刀環，殘暑炎炎尚未刪。
海望驚心人似蟻，城居盱目屋如山。
沉浮身世古今外，排宕盈虛方寸間。
一統樓中無甲子，平章冰炭自安閒。

二、

絡緯鳴秋不住啼，藍田滄海賦無題。

日邊殘照寒鴉背，塞上西風戍馬蹄。
三楚暮山樓歷歷，六朝春夢草萋萋。
龍荒八月初飛雪，幾見仙槎艤岸低。

三、

夜半遽亡藏壑舟，天涯萍梗任沉浮。
飄零木葉山堂暝，磊落星霜海國秋。
人立斜陽峰不語，曲終錦瑟水長流。
茫茫六合渾難辨，何處娑婆大九州。

七律 己丑秋雁蕩山紀游八章

一、

如幻丹崖翠嶂幽，呼盟趨就菊花秋。
滿天星露科頭坐，萬壑煙嵐把臂遊。
此夕閑雲來雁蕩，昨宵舊雨下龍湫。
天涯一舸人歸後，方寸誰刪故國愁。

二、

泉聲淅瀝夢中聞，楓柏初霜浸紫氛。
澄水一泓宜枕石，翠巒三面欲留雲。
扶筇絕巘山嵐淨，解佩中洲杜若芬。
顯勝門邊騰急溜，砉然浩邈走千軍。

三、

名山登覽慕高蹤，吟嘯頗舒磊塊胸。
彈指古今光荏苒，放眸環列綠蔥蘢。
秋深初竭寒潭水，夜杪猶傳古剎鐘。
他日重遊應記取，疏星涼露傍靈峰。

四、

形勝東南今雨來，扶筇登眺徙崔嵬。
山橫亙古煙雲闔，泉落層霄氣象開。
走馬峰巒猶顧盼，迎人鷗鷺不驚猜。
浩茫應有思鄉客，久立深秋白石台。

五、

東南走筆覓雄奇，山色泉聲供賦詩。
海上風雲恒際會，胸中丘壑自嶽崎。
人歸大澤鷗盟在，葉落虛廊鶴夢遲。

最是消魂殘照後，靈岩秋寺雨絲絲。

六、

斂衽臨虛入翠微，晨嵐釀雨故霏霏。

巒頭奇氣將虹化，潭底沉蛟欲劍飛。

心緒已忘紅豆子，生涯猶戀綠蓑衣。

側身天地茫茫也，逆旅百年知我稀。

七、

繞林烏鵲向南翔，誰遣長戈挽魯陽。

暝色當軒君擲笛，秋光涉沚我褰裳。

銀泉碧淨星潭水，玉露凝寒月窟霜。

欲問歸來滄海客，曾觀塵外幾紅桑？

八、

蒼山橫海迴無涯，晴雨南天幻曉霞。

疊嶂崢嶸開霧闕，虛空浩渺馭雲槎。

清溪花發千桃樹，曲澗橋連五柳家。

逸興琴書如有約，倩君細品武陵茶。

七律 己丑初冬南雁蕩山紀游八章

一、

巉岩千仞再躋攀，昨日南征雁蕩還。
出岫浮雲途荏苒，投林宿鳥語綿蠻。
微霜已白溪邊渡，斜照猶明海上山。
一攝心魂三界外，暮鐘幾杵近禪關。

二、

星霜茅店感雞鳴，迢遞江關第幾程。
凜冽泉流宜漱石，莽蒼郊野且班荆。
秋山林靄孤鴻影，曉日炊煙短笛聲。
擬約碧溪鷗鷺侶，仙姑洞下續前盟。

三、

萬壑笙鐘赴順溪，海天閩越望中低。
迂回雲嶂馳銅馬，幽迴星潭伏碧犀。
白露黃花秋水淨，西風古木暮鴉啼。
盈虛消息塵埃外，閬苑微茫不可梯。

四、

歸去來兮悟昨非。旅塵墨瀋滿征衣。
生涯已遂東山老，心跡猶循北雁飛。
河嶽莊嚴遵格律，煙嵐虛幻可隨機。
明王峰頂聞鐘唄，妙想乘風入翠微。

五、

平陽秋色暮蒼蒼，白石高臺望八荒。
甌越峰巒凝紫氣，蓬萊島嶼又紅桑。
淵源波動龍蛇影，洞府苔披薜荔裳。
挾瑟歸來滄海客。飄零兩鬢有新霜。

六、

溪山夢系故園心，河漢無聲渡碧潯。
千仞潭高星在水，一輪月冷露沾襟。
蓴鱸旅驛誰呼酒，環佩天風我撫琴。
賦罷停雲人欲去，五湖煙雨任浮沉。

七、

碧溪渡畔一停車，躍鯉灘前可卜廬。
罰酒且依金穀數，看山如讀古人書。

平居菊隱開三徑，妙想雲遊入太虛。
十萬黃精栽屋後，載煙披月曉來鋤。

八、

海上浮雲接遠巒，神州西望思漫漫。
林紅盡落鵑心老，霜白初凝鶴夢寒。
如訴灘聲知水淺，無眠月色怯衣單。
先生何事歌黃鵠，故里可求容膝安。

七律 己丑冬遊浙中壽仙谷二章

一、

壽仙峻谷壽仙游，古宅斜陽幾度秋。
雲淡天遙遷客意，岩扃壑秘野人幽。
山圍薄暮峰如峙，溪澈寒冬水細流。
俟得河清頭似雪，相期汗漫覓沙鷗。

二、

歷遍星霜鼎尚存，扶筇陟峻訪雲根。

溪流淺水灘聲遠，墟裡浮煙日影昏。

木落冬山晴不雨，雞鳴午院靜中喧。

昔人已叱白羊去，此地空餘黃石村。

七律 己丑冬游浙中武義大紅岩山四章

一、

嵐光曙色入微茫，如夢丹霞接彼蒼。

叢碧修篁雛鳳嘯，湛藍深澗蟄龍藏。

昇平下土非秦醉，魄磊孤衷本楚狂。

魚水江湖莫相憶，無關塵外幾滄桑。

二、

丹崖卓犖憶崆峒，雨雪其霏又北風。

亙古群生迷蝶夢，洪荒大化鑿鴻蒙。

幾經爭戰秦驅鹿，那得因循楚失弓。

百劫歸來赤松子，此時指顧夕陽紅。

三、

溪山莫負夕陽時，十里長廊畫似詩。
檻外煙雲隨幻化，胸中岩壑見雄奇。
蘭舟系櫂鷗盟在，蕉葉搖窗鹿夢疑。
驀地霜風吹爽籟，微茫暝色我誰其。

四、

丹霞畫檻尚徘徊，數九嚴霜曙色開。
吳越唱吟思汐社，阮劉避地憶天臺。
松濤吹籟千山寂，海客攜琴萬里來。
叱石初平今又至，故家猿鶴不驚猜。

七律 己丑冬遊金華雙龍洞公園二章

一、

歲寒命駕訪仙蹤，古木斜陽路幾重。
碧嶂蔥蘢雲庇護，平湖潋灩水朝宗。
曾經滄海茫茫日，一去崆峒渺渺峰。
何處洞天三十六，回頭咫尺見雙龍。

二、

何處梅花伴古稀，重遊故國思依依。
洞中雲水淵龍蟄，檻外塵埃野馬飛。
不異色空觀自性，渾忘歲月悟禪機。
一聲薄暮寒山磬，我欲乘風入翠微。

七律 己丑冬游金華赤松山二章

一、

葛狗不名誰與親，江山雄傑誤生民。
蒼黃歲月興亡事，俯仰乾坤偃仄身。
紫觀洪鐘驚幻夢，翠湖篴筏渡迷津。
赤松宮外神州地，何處人間不染塵。

二、

白石赤松舒望低，初陽照客過蘭溪。
空谷流光馳駒影，長廊步履印雪泥。
連雲台閣金翡翠，夢雨湖山碧琉璃。
先生已慣風塵老，不道扁舟歸去兮。

七律 己丑冬遊金華婺州公園

雲淡霜清婺水冬，天寧樓畔拄吟筇。
平橋霽雪遙岑翠，古木棲鴉積墨濃。
侵曉池台波潏灩，鳴琴溪澗玉琤琮。
相逢欲問天涯路，何處金華第一峰。

七律 己醜冬遊金華茶花公園

婺浦城南且駐車，芳洲勝境訪山茶。
虹橋清影連台闕，雪塔熙陽映水涯。
園梅雋秀初吐蕊，池柳蕭疏不藏鴉。
三冬未改滄浪意，一舸悠然四海家。

七律 己丑冬泰寧上清溪紀游二章

一、

又作洪荒太古遊，竹櫓窈窕入深幽。
千重迭嶂連雲起，萬竅鳴湍峽束流。
日仄顛崖山鳥寂，楓紅淺瀨穀風秋。
此間即是桃源渡，百曲清溪徑斗牛。

二、

偶見三冬樹著花，夕陽溪岸艤仙槎。
冰晶碧澗眠靈蟄，如燒丹崖枕落霞。
黑石渦流溪獺渡，青藤險洞野猿家。
古稀歲月知多少，樂得無涯遣有涯。

七律 己丑冬泰寧寨下大峽谷紀游二章

一、

壑秘岩扃費探尋，丘山如對故人心。
若非幽谷同蘭臭，安得平居辨足音。
竹韻清虛蘇武節，溪聲雋永伯牙琴。
湖濱應有三掾地，許我南窗抱膝吟。

二、

繁星如夢綴穹廬，渾沌重開斧鑿初。

雲湧昆崗飛電笑，川流大壑走雷車。

微茫歲月三生石，環抱峯巒太古居。

湛湛湖光澄表裡，此中莫道子非魚。

七律 己丑冬泰寧金湖紀游二章

一、

金溪九曲引雲長，杉嶺蜿蜒走莽蒼。

何處青山餘赤壁，無聲逝水赴斜陽。

菰蒲霜笛魚龍冷，墟裡炊煙黍稷香。

誰解當歌橫槊意，月明猶見鵲南翔。

二、

認取紅羊劫後身，沉浮陵穀幾番新。

湖山一瞬巡今古，蘭絮三生證果因。

空見靈岩巍寶剎，何來慈筏渡迷津。

紛囂燈火樓臺在，誰是羲皇上古民。

七律 庚寅暮春隨筆六章

一、

上巳清明自管弦，鶯花依舊太和年。
流春曲水蘭亭酒，向晚歸人柳寨煙。
黃竹何哀天雨雪，紅桑終變海成田。
憑軒莫作浮漚想，樓市如山月又圓。

二、

百憂思慮入蠶叢，急就青詞草不工。
紺碧杯中春是夢，海紅簾下月如弓。
微茫關塞嶽崎路，曠遠林泉澹蕩風。
避地網羅機杼外，江天萬里幾冥鴻。

三、

長憶當車攘臂男，深悲文典蝕叢蠶。
輕肥裘馬詒貓論，塗炭髡箝噤虎談。

詎有娑婆千劫火，終依蘭若一燈龕。
雞鳴此夕仍風雨，心史心香祀所南。

四、

海桑昨夢話浮沉，殊域春歸感慨深。
家國情懷何滿子，江山風雨白頭吟。
蛭螭蜃局悲無殼，薔草殷紅悔有心。
行腳埋愁徒荷鍤，但聞撮土值千金。

五、

何衰鳳德接輿歌，雲舸歸來兩鬢皤。
閱世自悲華表鶴，匡時誰援魯陽戈。
輕肥裘馬誇先富，麥秀江山吊篤癩。
十五萬人同此夕，照天燭火接星河。

六、

麥秋時節雨淒淒，魂夢關心系木樨。
海市迷金春草綠，瓊筵舞翠夜烏啼。
刀矛講席三緘口，鼎鑊公車再噬臍。
六月嚴冰終不泮，可曾消息到泥犁。

七律 庚寅題畫三章

一、

天倪太璞任虛空，豈羨解牛遊刃功。
豎白相忘磨涅外，死生隨順化機中。
金樽對酒嬋娟月，華髮簪花矍鑠翁。
重巘霧居甘豹隱，晚晴索笑別枝紅。

二、

旃檀微度意沉酣，莫向深禪說久參。
蕉雨高樓簫尺八，柳風曲岸酒春三。
懺情花落桃根渡，遺世人歸鈷鉞潭。
孤館淒迷燈一夢，回頭眼底是江南。

三、

岩壑高危不可梯，幽居桃李亦成蹊。
山前雲磴來玄鶴，屋畔星潭隱角犀。
白雁黃茅戈壁上，青牛紫氣玉關西。
主客相忘形意外，夜牖挑燈誦馬蹄。

七律 辛卯無題二章

一、

留約踏青三月三，閑依瓊閣仰天藍。
斜陽聽笛閩山外，煙雨歸舟粵水南。
暗柳藏鴉春畹晚，單衣浥露夜沉酣。
忽荒寥廓徜徉久，心在詩邊月在潭。

二、

一念渾涵遍九垓，忘機默照是心齋。
虹飛劍氣丹霄外，月湧潮音碧海涯。
豈遣鳩媒浮綠蟻，但由蝶夢上金釵。
遠遊何必悲岐路，隨處青山骨可埋。

七律 辛卯題畫雜詩十四章

一、

落筆煙霞列嶮岨，蘼蕪僻徑絕軒車。
歸舟斜日清溪渡，垂柳東風陋室居。
雪影梅花渾黑白，雲階月地抱盈虛。
心盟鷗鷺無機杼，恰似鴻蒙斧鑿初。

二、

青山碧巘兩模糊，醉墨淋漓失畫圖。
海嶠微茫精衛石，天涯遲暮子規呼。
懷人長想醇於酒，搖夢殘燈淡欲無。
我欲一川風雨外，扁舟欸乃入菰蒲。

三、

曲岸垂楊系短舫，春江新漲碧三篙。
山川畫意荊關筆，水澤詩魂屈宋騷。
甚少蒼茫留笛韻，更無沉鬱入琴操。
惆悵軟紅塵裡客，玄都道士又種桃。

四、

畫卷神遊臥客窗，東軒叢竹玉琤琮。
雙鉤著意描紅樹，飛白隨機寫碧瀧。
楊柳人歸長樂渡，菰蒲夢遠富春江。

漁隱圖成誰載酒，短笛無腔弄晚艫。

五、

蕭館吟哦屢撫膺，畫禪參證十年燈。

雲浮千疊暮山紫，月偃一灣秋水澄。

有淚鶉啼猶宛轉，無聲蝶夢太瞢騰。

形骸脫略皮毛盡，海運培風始化鵬。

六、

從容奇想入蒼冥，泉壑三千臥畫屏。

浦溆微茫春水漲，崗巒曲奧晚煙局。

倩誰擲笛憑高閣，攜汝褰裳涉遠汀。

解悟真如非色相，十年聽雨一燈青。

七、

萋萋卉木唱倉庚，太息迷陽卻曲行。

風雨筆端春事盡，波濤紙上晚潮生。

人歸澧浦遺環佩，夢遠汀洲失杜蘅。

休訝空弦琴掛壁，禪機解悟在希聲。

八、

詩想山河畫想容，樓臺礪礪有無中。
於風雨外生虛白，在水雲間入瀕蒙。
小隱能如鷗鷺約，遠遊莫及馬牛風。
空堂向晚曾來鵬，銅炭洪爐是化工。

九、

丙丁浩劫或重來，霧豹冥鴻不可猜。
泡夢縻之紅本子，浮生醉以紫金罍。
彤雲潦水迷三峽，黃竹悲歌動九陔。
偶有所思停畫筆，月明滄海又塵埃。

十、

岩壑清幽綠萬重，流泉時度上方鐘。
微生瀲灩水中月，偶露崢嶸天外峰。
小立回眸饒綽約，平居抱膝自從容。
曉來斂袂扶筇去，何處高崗訪臥龍。

十一、

披圖尋壑證三生，西子湖濱覓舊盟。
遁跡常懷非世想，乘流猶戀在山聲。
唐捐煙火惟餐石，難辨清淄且濯纓。

無語括囊忘毀譽，鳳凰臺上聽吹笙。

十二、

瓦牖茅茨處士居，乾坤一統即吾廬。

風來竹榻禪機動，山入衡門罨畫如。

蓼浦橫舟閑釣月，草堂欹枕倦拋書。

蛩聲初上新秋夜，磊落星河仰碧虛。

十三、

百年世事感嗟多，日月江河濁浪淘。

成敗千秋歸後笑，恩仇一粲唱同袍。

中原紛擾驅秦鹿，大澤蒼茫失楚騷。

滄海橫流猶砥柱，青青松壽仰山高。

十四、

滄浪停櫂濯吾纓，落拓難移出世情。

供眼雲煙如鳳起，縈懷溪瀨作雷鳴。

禪心可悟喧中靜，畫境宜逢雨後晴。

紙上崗巒堪卜宅，只緣泉水在山清。

四言題畫雜詩二十首

一、

雪天月夕，關山沉寂。

寒暑往來，轉移今昔。

人生如寄，問予何適。

吾心廓然，歸元守一。

索笑梅花，悠悠羌笛。

二、

群峰無語，潺湲一溪。

泉聲入耳，敢問心齋。

三、

蒼茫山海，何處神州。

長安不見，使我心憂。

止觀內視，畫卷馳求。

涓涓泉響，飄飄雲浮。

馥芬百卉，可冬可秋。

清奇此境，夙世曾遊。

四、

燕去鴻來，花開花墜。

彈指興亡，浮雲富貴。

隨適而安，人生百歲。

巍巍青山，悠悠流水。

還我初心，超然物外。

五、

泉奔雷動，風雨更闌。

恬然坐忘，惟心所安。

六、

花開有約，夢逝無餘。

忘機默照，莫執盈虛。

某山某水，惟德是居。

七、

翹首南山，崢嶸在望。

三徑當軒，青松掩映。

宿雨初收，溪雲乍漲。

隱幾聽泉，嗒然坐忘。

八、

河山渺邈，今夕何時。

歲雲暮矣，松柏差差。

家邦天外，歸止難期。

陽春白雪，予意誰知。

九、

倦眠白石，醉倚青松。

荒山春雨，蕭寺晚鐘。

潺潺流水，何處仙蹤。

十、

好春將暮，風雨闌珊。

吾廬雖小，容膝易安。

聽泉隱幾，我心清閒。

煙雲開合，瞻彼南山。

十一、

春山凝黛，春水鳴箏。

斑鳩喚雨，鄉思夕生。

十二、

南皋望遠，天淨雲閑。

好春時節，鳥語間關。

淙淙流水，淡淡春山。

吾廬三徑，容膝可安。

十三、

春山隱隱，春水迢迢。

春雨樓頭，春夢玉簫。

春風寥落，紅豆生苗。

十四、

春泉幽咽，春雨模糊。

客途春半，子規暮呼。

蒼山萬疊，何處吾廬。

十五、

夢魂有約，青草池畔。

暮雨江南，剪燈山館。

門閉梨花，夜寒誰暖。

十六、

歲雲暮矣，冰雪天涯。

戍樓望月，古塞聞笳。

蒼茫大地，何處吾家。

我心所憶，故國梅花。

十七、

飄灑六花，歲已雲暮。

玉砌雕闌，冰河雪路。

羌笛悠悠，鄉關何處。

松柏後凋，蒼蒼如故。

十八、

碌碌奚為，勞形勞心？

白雲歸岫，飛鳥投林。

瀟瀟雨歇，澗水鳴琴。

結廬境外，在山之陰

上方清嘒，滌我煩襟。

十九、

可以濯纓，滄浪之水。

可以幽居，武陵之坻。

燕去鴻來，雲生風起。

世間何物，能令公喜？

巍巍青山，靜觀其美。

二十、

容膝可安，簞食足慰。

楓槭初紅，菊花乍蕊。

怡我心神，秋山秋水。

竹笛悠悠，斜陽之外。

詞選

齊天樂 丙辰秋思

夕暉紅暈歸鴉背。
雨煙半迷山翠。
岸際楓疏，橋頭柳暗，雁字斜題天外。
扁舟一葦。
更幾落荒村，幾灣寒水。
寫上生綃，淺秋滋味少人會。

東籬菊花乍蕊。
冷芳幽自賞，岑寂誰慰？
喚取閑鷗，招來素月，商略細吟輕醉。
宵深不睡。
看簾隙流螢，空忙飛墜。
枕畔屏邊，又聲聲絡緯。

沁園春 甲子年倚聲于香江

風帽寥蕭，落拓江湖，長亭短亭。
記古臺吹竹，碧雲將暮，津梁把盞，柳色方青。
十二樓中，而今人去，佩冷煙沉月自明。

吾老矣，竟傷春傷別，涕淚飄零。

十年一夢瞢騰。但夢覺醒來百感生。

歎綠鬢愁白，人嗤太早，黃金散盡，客怒無名。

老去填詞，歌吟清苦，拍碎紅牙誰與聽。

驚回首，見夜燈萬戶，海氣冥冥。

木蘭花慢 六四百日祭

又誰歌楚些，招魂何地人間？

怪未夏先秋，凋零百卉，六月生寒。

連番滂沱風雨，問皇天后土幾時乾。

夜半披衣孤起，不言拍遍闌杆。

江山。涕淚眼中看。西北是長安。

思提匕入秦，頭顱擲碎，濺血斑斑。

十年恩仇歸報，見蕭蕭白髮出韶關。

青史須當有日，黨碑元佑重刊。

摸魚子 已巳三月，有感而賦。時旅次印尼椰嘉達

莽冰霜，玉門關外，春風不綠楊柳。
幾人慷慨歌金縷，馬角烏頭相救。
君記否，送京國春歸，今已十年久。
誰乎不朽？
算直筆春秋，平章功罪，千古莫須有。

庚申事，枉許回天妙手。能箝十億人口？
萬家墨面無聲處，一曲河殤奏又。
獅子吼，向鼎鑊刀叢，擲碎男兒首。
今予酹酒。
禱絕寒生還，清明來日，重會舊時友。

水龍吟 閩中平遠台晚眺

古台平遠憑高，山青一發中原迴。

浪淘英物，雲浮蒼狗，斜陽立盡。
萍梗飄蕭，行歌去國，蒼涼心境。
更桃花薺麥，劉郎前度，多少恨，休重省。

銀漢氣寒劍影。遍天涯，幾人孤醒。
鳴蜩四面，殘星數點，銷凝夜永。
如此秋聲，冰河鐵馬，夢中曾聽。
念長安今夕，錚然葉下，又西風勁。

水龍吟 六四百日祭

振衣獨立蒼茫，觚棱北望愁無際。
幾時重見，戰旗風采，悲歌燕市。
絕食三千，遊行百萬，昂揚鬥志。
但漫漫長夜，雞鳴不曙，高難問，天何意？

終古毋忘此夕，慘神州，傷心六四。
橫流碧血，頭顱擲處，國魂喚起。
欲為乾坤，存留一點，浩然正氣。

要昏昏八表，滂沱雨哭，作英靈祭。

夜遊宮四章

六四國殤，已逾百日，中國大陸各地暴雨不晴，江河氾濫成災。天地有靈，當為神州一哭。然則蒼生何以堪。此際故山北望，愴懷萬端，賦此四則，以遣哀思。

一，

長記燕台擊築。

更易水，悲歌相續。

烈火戰車飛骨肉。

慘神京，萬千人，同一哭。

誰賦安魂曲？

一時奏，哀弦豪竹。

來歲清明春草綠。

吊英靈，向碑前，酹醺醪。

二，

痛問今夕何夕？

聽遍野，離鴻哀泣。

長夜漫漫應有極。

望中原，拍闌杆，雙淚滴。

大好頭顱擲。

拯邦國，粉身何惜？

熱血滿腔能化碧。

喚風雷，起神州，破沉寂。

三，

民主薪傳相接。

殺不盡，江山雄傑。

南八男兒有奇節。

勇犧牲，語爹娘，莫悲切。

薦我軒轅血。

染風采，戰旗高揭。

動地悲歌歌未徹。

更何時，縛蒼龍，祭英烈。

四，

大道橫行狼虎。

訝六月，冰霜猶互。

上帝也悲人世苦。

雨滂沱，瀉江河，弄悽楚。

舉目無乾土。

渺茫茫，神州何處？

遙奠英魂有詞賦。

告相知，唱雄雞，天欲曙。

沁園春 述懷

早歲也曾，彎弓射鵰，氣雄萬夫。

奈癡可盟鷗，綢繆計拙；狂宜嗟鳳，經濟才疏。

瀚海乘桴，滄浪濯足，自許冰心在玉壺。

公何必、怪獨醒遺世，擊缶嗚嗚！

十年聽雨江湖。

笑不似浮雲出岫初。

更物表神游，修持清淨；山中坐忘，參悟虛無。

灑雪新晴，寒梅乍蕊，坐對長天月影孤。

誰相問、儻來朋良夜，秉燭邀吾？

沁園春 草堂寄遠

時欲暮乎，之子何當，顧我草廬？

但軒堂陋簡，臨窗有竹；路途僻靜，出邑無車。

梁甫吟成，華胥夢罷，粗饌清茶茹菜蔬。

慵閱世，祇情懷自許，蘭馥梅臞。

皈依本色真如，豈計較窮通得失歟？

況清佳山水，吾將入畫；淋漓筆墨，君亦當書。

塵外風光，胸中丘壑，芥子須彌皆可居。

銷凝久，任蒼茫暝色，漸上衣裾。

綠意三章

一、

癸酉清明

吹花作絮。又海棠謝了，春意如許。
惹甚閒愁，一任東風，送得幾多春去。
臨高莫近憑闌處。怕相對，夕陽無語。
祇惆悵，暮靄重重，遮斷天涯芳樹。

遙想禁煙庭院，那人悄不寐，宵半誰侶。
擁袖衾寒，照影燈孤，忍聽瀟瀟夜雨。
夢魂未識蓬山路，夢難到，瓊樓玉宇。
且分付，青鳥殷勤，問訊回文詩句。

二、

春雨，丙辰年前之舊作

星迷月失。問收拾幾多，雲氣重織。
茵草池塘，一部蛙聲，乍漲半篙新碧。
紅樓隔望飄燈冷，總惆悵，泥濘芳陌。
念此際，野渡舟橫，應是晚來潮急。

欹枕銷凝夜寂。聽他響不斷，簷溜猶滴。

別夢依依，往事沉沉，淒絕故人心跡。
須臾漏盡東方白，想又見，滿城紅濕。
覓舊影，漸近簾櫳，深巷杏花消息。

三、

戊辰，客居印尼

殊方客慣。又燭影雞聲，人世春換。
斜日歸舟，曲岸垂楊，新漲平橋波滿。
東風易綠天涯路，聽不得，杜鵑呼喚。
怕惹他，幾許閒愁，還被東風吹亂。

心念舊家侶伴。夢魂似有約，青草池畔。
二月江南，暮雨瀟瀟，最憶剪燈山館。
黃昏門閉梨花雪，問此際，夜寒誰暖。
向晚來，翠袖憑闌，何處高樓簫管。

菩薩蠻八章

一、

傷心誰說飄零久，
樓頭又見青青柳。
切莫問歸期，
等閒鸚鵡知。

不辭風月凍，
萬裡還家夢。
夢到武陵溪，
斷腸烏夜啼。

二、

柳絲能綰韶光住，
尋思江水西流去。
夢裡說春愁，
夕陽樓外樓。

春愁濃似酒，
春夢消凝久。
夢覺聽倉庚，
四山風雨生。

三、

去年曾送行人處，

今年又送春歸去。

雨暗驛邊橋，

柳絲千萬條。

青衫沾淚透，

非為花枝瘦。

天外水滔滔，

不如離恨多。

四、

柳絲垂直池波歇，

杏花無力飄香雪。

吩咐鳥聲輕，

小樓人未醒。

苦貪鴛被暖，

日上闌幹半。

昨夜夢歸遲，

萬山風雨迷。

五、

東風不礙垂簾隔，

當筵又見花顏色。

宴罷夜將除，

月斜春夢餘。

雞聲庭宇外，

曙色寒如水。

殘酒欲長歌，

旅愁銷幾多。

六、

落花時節天難曙，

小樓一夜愁風雨。

相對蠟燈紅，

玉人春夢中。

夢回雞塞迴，

六曲屏山冷。

門外喚倉庚，

池塘芳草生。

七、

晚風乍歇簾纖雨，

嫩寒庭院黃鶯語。

人醉杏花天，

夢回愁似煙。

殘煙迷逝水，

芳草斜陽外。

紅豆可憐生，

綠窗鳴錦箏。

八、

白雲歸岫銷殘雨，

碧天與水東流去。

秋色到沙鷗，

倚樓人亦愁。

瀟瀟飛木葉，

襲面金風烈。

何處望長安，
夕陽山外山。

念奴嬌 壬申中秋

潮喧初寂，向晚來，桂魄重開海氣。
一發青山登望處，雪路冰河千里。
北斗橫斜，南枝乍冷，烏鵲頻驚起。
天涯此夕，倦遊客子歸未。

誰念倚月當秋，高寒樓閣，多少團欒意。
遮莫兩肩清露濕，諳盡孤愁滋味。
流水今情，飄花昨夢，都在簫聲裡。
征鴻難覓，吟箋欲遣無地。

金縷曲 辛未重陽，時值辛亥革命八十周年紀念
後五日

客子歸來否？便歸來，河清可俟，幾何人壽。

梁燕塞鴻歸來去，容易黃花重九。

念故國，江山如舊。

海上乘桴人去後，遍天涯，淅淅西風又。

吹白我，少年首。

一肩霜露孤憑久，耿無聲，西流銀漢，低垂星斗。

八十年間興廢事，閒話欲尋漁叟。

祇百姓，依然芻狗。

澤畔行吟吟不得，破牢愁，思買高陽酒。

問誰是，補天手。

點絳脣二章

一、

京洛淄塵，

十年一夢驚回首。

關河秋又。

有淚傾如溜。

墜葉無聲，

夜靜聞村狗。

憑闌久。

天風吹酒。

河漢移星斗。

二、

一葉爭然，

天涯驚問今何歲？

無多酸淚。

都付東流水。

三兩啼鳥，

夜半醒殘醉。

簫聲外。

千山如睡。

星斗飄搖墜。

醉花陰二章

一、

小巷人家朱閣上。

誰把清歌唱？

句句斷人腸，

牆角樓頭，帶雨梨花放。

闌幹曲曲屏山障。

深下紅羅帳。

永晝鎖相思，

試問修娥，生得怎模樣？

二、

蘆荻花疏楓樹暗。

天際歸鴻慘。

水國又深秋，

不恨西風，只恨東風暫。

柳絲不系斜陽纜。

冉冉沉沙岸。

小舫上漁燈，

月在湖心，人比湖光淡。

浪淘沙 春思

何處子規啼？

芳草萋萋。

小樓登望日偏西。

記得送君楊柳岸，

月色迷離。

別後幾多時？

物換星移。

池台冷落昔人非。

只有多情雙燕子，

猶自歸飛。

行香子 鄉心古意

吊古誰來，輦路封苔。

憶繁華、對景暗呆。

荒蕪宮苑，翠柏青槐。

更悲興亡，頻彈鋏，再登臺。

舊地徘徊，鷗鷺驚猜。

望家山、塊壘填懷。

鄉愁如鑄，何處湮埋。

任雲侵衣，風吹帽，雨沾鞋。

沁園春 春望

歲換殊方，積雪漸融，來復一陽。

正汛水流澌，斗牛東指；春風吹暖，塞雁回翔。

嬌杏初花，夭桃乍蕊，楊柳蕭疏展嫩黃。

追疇昔，念謝家幽夢，青草池塘。

解衣海曲仿佯，望千疊山蒼映水光。

更舒展躬身，扶筇險徑；淨澄心慮，隱幾虛堂。

彈指頃時，神遊三界，河漢星雲去不妨。

須歸去，要醉呼明月，舉白飛觴。

多麗 閩中永泰天門山紀遊

故鄉行，行遍千崖逶迤。

料青山、驀然見我，也應如是我喜。

潤清氛，霧迷翠嶂；蕩浮雲，風湧綠翳。

雨霽重巒，澄泉傾碧；景輝崇壁，彩霓泛紫。

徹層霄、氣寒西北，龍蟄古潭裡。

回頭望，危岑矗列，象笏螺髻。

問多少殘春秀色，向人猶自旖旎？

更溪前，濯纓臨鏡，白髮蒼顏亦妍麗。

竹影千竿，松蔭三徑，荊籬茅屋適公意。

夕陽外，小橋斜架，灘上水流細。

歸來晚，暝色糝衣，并落煙起。

傷春怨 二章

一、

怨也何時息？

風送流年如翼。

夢逝縱無蹤，

心上啼痕誰拭？

頃間窗兒黑，

舊事難追憶。

一杵晚鐘聲，

夕照外，歸鴻側。

二、

夜永難將息，
夢裡家山何覓？
欹枕對孤燈，
舊事共誰追憶？

漸賒東風力，
浥雨花枝泣。
叵耐麥秋寒，
不忍見，天涯碧。

江南柳 無題三闋

一、

迷離境，樓臺半雲藏。
我與美人相對雙，粼粼碧水映初陽。
曉鏡理紅妝。

晴乍暖，楊柳縷金黃。

簾外參差來燕子，夢中春草綠池塘。

鼓瑟指微涼。

二、

飄零久，他鄉作家鄉。

萬里關河回望中，錦筵顧曲憶周郎。

別後水雲長。

梅子落，紅杏燦山房。

人意清澄如止水，春心冷淡有殘霜。

欹枕綠琴旁。

三、

東風外，幾回倚軒窗？

淡雅湖山清若眉，懶將冷豔鬥春芳。

新月已昏黃。

雲水冷，別夢付流觴。

覺後嚴妝端肅敬，佛前默默奉心香。

塵慮莫牽腸。

南歌子 臨屏次韻暗香如沁

陌上春花發，心中雪未消。

扁舟傍柳泊溪橋，愛聽瀟瀟夜雨，擬種芭蕉。

寂寞歸潮遠，晨鐘緩緩敲。

夢魂不共月妖嬈，無奈襄王垂老，神女難邀。

釵頭鳳

歸鴻唳，春花墜，

鄉心懸掛浮雲外。

相思淚，何時綴？

來時如夢，去時如水。

醉！醉！醉！

斜陽裡，風煙起，
青山疊疊三千里。
憑欄意，誰能理？
離當無憾，聚當無喜。
逝！逝！逝！

滿庭芳 題內子寫觀音畫像

寶相莊嚴，澄清三界，蓮池光靄重重。
慈航穩渡，覺岸沐祥風。
消弭多生債障，應許我、淨念從容。
安心甚，聲聲佛號，誠意自深衷。

六塵時搗擾，春心紅豆，夜雨青桐。
悟形影，頓時四大皆空。
苦樂去留無跡，長天過、杳渺冥鴻。
隨緣處，菩提煩惱，一例證虛同。

蘭陵王 晚春憶別用白水韻

白雲化，水韻山容淡雅。

煙波上，還似美人，曉鏡凝妝盡瀟灑。

襟懷難細寫，情話，芳柔誰亞？

長亭外，紅藥檻邊，微雨吹笙杏花下。

追思舊池榭。念呼酒行歌，疇昔遊冶。

風燈零亂清明夜。

驚黃鳥醒夢，柳綿飄暖，征人古驛促遠駕。

綠楊系斑馬。

傳聲，別離者。

悵汎泛江河，草熏原野。

聲聲鶗鴂春歸也！

更愁擾如織，涕流如瀉。

劉郎此去，任日月，自代謝。

沁園春 丙子秋，移居加拿大有懷寄遠。

遁遠逃秦，東訪支機，苟安以之。
算滄瀛三淺，年華似水，鷗夷一舸，心緒如詩。
平楚疏林，斜陽衰草，眺盡蒼茫有所思。
雙溪路，記墟煙牧笛，暝色征衣。

月明乍冷南枝。
且寄語西烏莫夜飛。
念關山迢遞，桑榆方晚，鄉園寥落，松菊何其。
酒畔燈孤，天涯夢渺，賦得停雲誰與知。
憑相問，甚故人也道，歸去來兮。

沁園春 庚辰冬日自題江山晴雪圖

羈旅海涯，展讀詩書，時當歲闌。
正朔風乍起，擁爐有約；蠟燈初上，惹夢無端。
失國孤臣，思鄉遊子，一曲琵琶再出關。
真愁絕，又雪天月夕，恁地荒寒。

莽蒼千古江山，見玉兔金烏自往還。
歎英雄輩出，生民誤盡；市朝輕換，王氣銷殘。
擊節行歌，憑欄呼酒，來日應知去大難。
遙相問，念梅花舊侶，可否平安？

水龍吟 辛巳暮春 California Pebble Beach 賦感

驅車直上郊原，旅愁荏苒西洲岸。
連空海水，重重蒼翠，波明沙淡。
鷗鷺歸來，似曾相識，向人如喚。
有桎杈老樹，騰飛天半，風雷動，龍蛇幻。

終古濤聲不斷，又幾回、市朝輕換。
平臺斜照，關山無限，碧雲催晚。
萬裡投荒，十年辭國，行吟澤畔。
問前程何處，青旗客店，覓高陽伴。

鷓鴣天 戊寅春思十二章

一、

婪尾芳醪慰寂寥，東風紅豆易生苗。
斜陽院落調瑤瑟，細雨樓頭憶玉簫。
人悄悄，夜迢迢。殘燈如夢自飄搖。
春來陌上花開矣，不見征鞍系柳條。

二、

枉作回文錦字詩，今生自分會無期。
迢遙碧漢途難越，咫尺蓬山夢易迷。
春畹晚，燕參差。單衣濕雨立多時。
柳花明日飄揚盡，池上青萍總不知。

三、

紅豆拋殘劇可憐，清狂料理費吟箋。
差池燕影輕寒院，宛轉鶯啼小雨天。

春是夢，月如煙。無端錦瑟憶華年。
奈何花落隨流水，白髮西風夕照邊。

四、

曾向瑤池月下逢，碧波照影憶驚鴻。
難來蟬鬢燈前綠，猶得桃花酒後紅。
春有約，夢無蹤。夕陽如醉水流東。
楚山雲雨重重隔，何處樓臺想望中。

五、

忍對春燈剔落紅，殘宵猶得夢從容。
花前久立盈階露，月下遲歸滿袖風。
雲易散，水常東。蓬山阻隔一千重。
殷勤宿鳥空來去，碧海青天語未通。

六、

為有雲屏倚綠琴，闌珊情緒怕幽尋。
壇前易解拈花意，席上難逢顧曲心。

天黯淡，夜深沉。小樓寒盡閉春陰。
許多風雨憂愁事，付與流鶯仔細吟。

七、

豆蔻歌圓透碧紗，含羞半面掩琵琶。
嫩晴亭榭巢新燕，微雨池台噪曉鴉。
心恍惚，意諳嗟。昨宵有夢夢還家。
歸來不見春歸處，終念瀛洲隔海涯。

八、

猶得殘宵料峭寒，鳳屏夢斷怯衣單。
天涯煙水迷芳草，枕上燈花憶故山。
風嫋嫋，雨潺潺。賞春意興未闌珊。
勸君鄭重當時約，別後情懷各自安。

九、

紅燭生花照眼明，故山依約夢中青。
茶煙縷縷烹龍井，竹韻蕭蕭繞鳳屏。

思往跡，歎今情。此宵風雨共誰聽。
朝來綠遍天涯路，春到江南第幾城。

十、

蝶夢鶼啼未肯休，繁華與水付東流。
年年芳草生荒沼，日日斜陽到小樓。
歌錦瑟，醉瓊甌。惜春還解惜春愁。
落花時節多風雨，莫下珠簾碧玉鉤。

十一、

景物飄零感夕陽，一春心緒費思量。
落花庭院歌金縷，殘月樓臺醉玉觴。
風露冷，水雲長。歸來幾見海塵揚。
明朝散髮扁舟去，何事殷勤理舊狂。

十二、

有限春光到眼前，銷魂最是落花天。
誰家短笛催殘照，何處高樓起夕煙。

傷往景，歎流年。黃昏時節下重簾。

東風又綠江南路，門外啼鶂勸早眠。

臨江仙五章

一、

白袷春衣新試了，雲屏猶怯餘寒。

連宵風雨聽潺潺。

綠窗人睡起，獨自莫憑闌。

燕子歸來書未至，相思憔悴芳顏。

幾番花發又花殘。

無端鶂鴂語，斷送好江山。

二、

懊惱飛花隨逝水，春來春去悠悠。

相思欲寄恨無由。

青青簾外柳，不肯系行舟。

見說天涯芳草綠，江山唱了斑鳩。

斜陽如夢憶前遊。

黃昏蒙細雨，吹笛上西樓。

三、

過了清明春事盡，東風吹夢吹花。

遊絲落絮滿天涯。

蕭條關塞路，杜宇勸歸家。

客裡閒愁愁幾許，無端紅豆生芽。

江山容易夕陽斜。

登樓休北望，思酒且烹茶。

四、

短夢如雲來復去，連宵聽雨簾櫳。

忍寒愁對一燈紅。

年光留不住，容易棟花風。

暮靄微茫沉海色，關山落日匆匆。

此時登眺與誰同。

闌杆憑立久，嘹唳聽征鴻。

五、

十二闌杆孤倚處，西迴銀漢無聲。

誰家長笛夜淒清。

櫺邊斜月白，夢裡故山青。

道是乘桴人去後，春風春雨曾聽。

悠悠不盡古今情。

關河蕭瑟又，塞雁正南征。

臨江仙另二章

一、

題畫

煙水菰蒲成永憶，江南歸夢初還。

聽風聽雨寫春山。

不求深寄意，但作畫圖看。

丘壑三千皴染就，筆情墨韻斑斕。

古愁莽莽說應難。

海塵揚未了，休去倚危闌。

二、

次韻伍君梨花

群玉山頭誰得見，相思越樣芳容。

驀然回首雨煙中。

倚樓寒翠袖，春意似愁濃。

雪色月光明白共，曉窗攬鏡妝慵。

一池清碧激東風。

湔裙曾有約，歸夢莫匆匆。

采桑子二章

一、

愁腸薄酒難成醉，
不寐中宵，風露沉銷。
月白西窗幾處簫。

披衣乍起登臨意，
心緒如潮，天地空寥。
何事無言立市橋。

二、

芙蓉簾幕春寒閉，
風雨連宵，銀燭低燒，
夢醒三更聽夜潮。

朝來無覓春歸處，
官柳垂條，紅豆生苗，
孤館何人慰寂寥。

南鄉子三章

一、

海水又飛揚，
滿目江山盡夕陽。
北望茫茫雲一片，彷徨。
何處登臨是故鄉。

心緒太蒼涼，
拍遍闌杆意欲狂。
有淚如湍傾不得，思量。
披髮乘桴下大荒。

二、

夕照勸登樓，
眼底山河不盡秋。
舉世無人知我也，心憂。

何覓高陽舊侶儔。

殘酒憶神州，

獨客天涯易白頭。

時代遷移如走馬，休休。

又見新田換故丘。

三、

花影上簾鉤，

如夢春陰閉小樓。

滿徑落紅慵不掃，心頭。

卻起無端淡淡愁。

燈下憶明眸，

素手曾攜杜若洲。

一自擷芳人去後，知不。

情入回腸寸寸柔。

浪淘沙 丙寅歲杪再赴南洋前一日作

獨自倚殘霞，數盡歸鴉。

蓬萊三淺說年華。

前度劉郎今不見，依舊桃花。

遲暮已堪嗟，何況無家。

南行明日又天涯。

椰雨蕉風人萬里，碧海黃沙。

蝶戀花 己巳寄遠八章

己巳除夕，青燈孤對，落寞無聊。錄年來陸續所譜蝶戀花詞數闕寄遠。

詞意美人芳草，其間不無家國之思之寄託。悱惻纏綿亦彷彿六一正中之遺。

一、

九十春光成浪擲。

幾許清愁，和雨和煙織。

莫上層樓閑佇立，
落紅正逐歸潮急。

剔剪燭花思往跡。
夢裡家山，一片傷心碧。
斷續到明簷溜滴，
故人去後無消息。

二、

記得西樓聽雨宿。
相對殘宵，共剪巴山燭。
莫道江南春意足，
回頭不見人如玉。

燕去鴻來何太促。
一任花飛，飛上闌杆曲。
聞說天涯芳草綠，
前裙夢斷應難續。

三、

一枕惺忪春睡覺。
飛絮濛濛，亂點芙蓉幕。
晝永與誰消寂寞，
相思調入瑤琴索。

鏡裡形容驚瘦削。
花事飄零，人事渾非昨。
一語丁寧君記著，
看花鄭重明年約。

四、

偶遇時逢梅乍蕊。
叵耐重來，又見千山翠。
幾度落花隨逝水，
多情反受無情累。

送得春歸人憔悴。
倚遍闌杆，心意憑誰會？
小雨紛紛殘照外，

沾衣不是相思淚。

五、

燕子隔簾鳴永晝。

何事東風，池水頻吹皺。

一自采蘭人去後，

門前誰種雙紅豆。

襟袖無端沾淚透。

不道離情，只道花枝瘦。

可是春光看未夠，

言愁已過愁時候。

六、

客裡春愁愁似海。

鶗鴂聲中，一晌繁華改。

兩鬢添霜腰減帶，

難酬花月尋常債。

庭院深深誰與待。

午夢啼殘，無可黃鶯奈。

昔日倚樓人不在，

江山總被浮雲礙。

七、

去日悠悠歡苦短。

別是春前，今已春將晚。

料峭春寒誰與暖，

剪燈最憶梅花館。

春水流芳流不斷。

客思如絲，總被風吹亂。

何事杜鵑頻叫喚，

行人漸覺無家慣。

八、

別後重來春已暮。

慘綠殘紅，風雨湖濱路。

萬縷千條垂柳樹，
何曾系得斜陽住。

不道天涯離思苦。
錦字書成，誰解回文句？
魚雁悠悠無覓處，
人問惟有情難訴。

蝶戀花又二章

一、

小樓昨夜眠未穩。
日上簾鉤，怏怏人初醒。
塵暗菱花慵理鬢，
金爐煙斷餘香燼。

難倩青禽傳遠訊。
廊外啼蛩，苦苦催寒緊。

無奈長天排雁陣，
黃花又報西風近。

二、

不斷空階啼絡緯。
枕簟新涼，淺酒難成醉。
別院清歌醒獨睡，
倚闌何意無人會。

誰共孤光千裡外。
數盡寒星，冉冉明河墜。
如夢年華隨逝水，
天涯莫滴悲秋淚。

念奴嬌 以詞代柬寄劉友德

節近重陽，忽接舊時同學電郵相邀，即日回鄉參加畢業五十周年聚會。半紀飄泊，音書寥落，聞說故舊師友大多健在，能不悲喜交集，感慨萬千？所憾瀚海遙隔，無法如期赴約。時值異國秋風秋雨，深宵不寐，偶賦「念奴嬌」一章，以詞代柬聊寄離情。

茱萸初折，乍殷勤青鳥，傳音天際。

聞道故人無恙在，慰藉半參驚喜。

白首重逢，黃花相約，心事如潮起。

生涯略似，飄萍滄海而已。

誰解冷雨敲窗，征鴻唳夜，客裡悲秋意。

五十年間家國事，變幻浮雲蜃市。

人壽難期，河清可俟，遊子歸來未？

以詞代柬，離情萬里遙寄。

長亭怨慢 丙戌初冬自題雪天月夕中堂

六花灑，朔風吹急。

雪路冰河，瓊瑤堆積。

莽莽江山，月明千里照寒碧。

鄉園夢斷，誰三弄、陽關笛？

草屋約圍爐，敘契闊、何如今夕？

追憶，

念殘氈擁節，海上孤臣心跡。

窮荒萬古，算祇有、塞鴻相識。

漫檢點、百代興亡；驀回首、頓成岑寂。

儻故國春回，問訊紅梅消息。

百字令 丙戌歲暮加拿大西南安大略省初雪後有感而作

行歌去國，又乘槎萬里，孤羈遊歷。

十載曹騰渾一夢，落拓窮荒蹤跡。

雪灑邊城，風狂大野，天地茫茫白。

周旋寒暑，往來今古消息。

遙憶江左當時，相攜溫語處，燈紅酒碧。

花影四廂春畹晚，筵上誰人吹笛？

青草池台，斜陽門巷，鶯燕曾相識。

臨高憑眺，江山如此岑寂。

滿江紅 憶別

記否廊橋攜手處、長車送別。

正傷感、邊城向晚，胡笳吹徹。

舊雨難忘歌一曲，

行人已去山千疊。

更茫茫煙水碧雲天，遙相接。

殘照外，征鴻列；孤館畔，寒螿咽。

看飄飄起舞，滿林黃葉。

此夕重臨風景地，

何年再遇清秋節。

到夜深朔氣走千軍，聽簷鐵。

百字令 丙戌歲暮登 Gatineau Park 觀雪志感

登臨縱目，見奔馳萬馬，群山西向。

莽莽關河迷夕照，何處神州在望？

朔氣盤空，彤雲催暮，城闕胡笳響。

玉壺天地，六花飄灑如掌。

遙想京國良宵。當爐酒暖，高樓燈初上。

倜儻五陵諸俠少，消遣閒愁清恙。

錦座傳鉤，金筵飛斝，徹夜歡歌唱。

興亡如夢，喚誰千古惆悵？

蝶戀花 丙戌懷感八章

一、

江水流花春不駐。

明鏡衰顏，轉眼歲時暮。

哀樂相關方寸處，

盈虛代謝無今古。

心外本無清淨土。

曲折屏山，夢裡曾遊臥。

絕巘巉岩舒信步，
世間何事頻回顧？

二、

似綺桃花籬外放。
落日灘頭，誰把漁歌唱？
聞道江南春水漲，
風蓑雨笠憑孤往。

三面山青圍碧嶂。
小小茅廬，著在雲煙上。
一個蒲團惟坐忘。
年來漸息非非想。

三、

滄海揚塵渾未覺。
王謝門前，變幻新城廓。
對酒無人聊獨酌，
市朝自唱蓮花落。

千古英雄悲寂寞。
不定驚棲，輾轉南飛鵲。
心緒蒼涼難寄託，
一江皓月思橫槊。

四、

莽蒼江山憑遠矚。
逆旅乾坤，顧我形容獨。
中夜呼誰同秉燭，
春歸何處難追逐。

廣廈千尋嫌局促。
五柳堂前，擬種松和菊。
一水滄浪堪濯足，
紫簫信奏無腔曲。

五、

世味遍嘗知苦樂。

往日風流，轉眼成蕭索。

皓月霜天聞曉角，

天涯夢醒人非昨。

上下黃泉窮碧落。

千古悠悠，惟有情難托。

季子重來承一諾，

與君再訂三生約。

六、

一葉爭然驚暮歲。

斜照關山，都在西風外。

又見長天排雁隊，

倚闌何意無人會。

與子今宵須共醉。

慷慨高歌，莫擊珊瑚碎。

此別有如東逝水，

臨岐不灑男兒淚。

七、

代謝陰陽誰主宰？

人事匆匆，彈指逾千載。

柔櫓一聲歌欸乃，

桃花流水今何代？

莫怪側身天地隘。

爾許禪心，只住清涼界。

隱幾虛堂觀自在，

泉聲松籟俱無礙。

八、

淩冽新霜凝客舍，

獨坐宵深，一穗燈魂炧。

夜氣盤空排萬馬，

秋聲砰湃如潮下。

心緒蒼涼誰可寫，

好夢難成，勸汝登樓也。

斗大明星垂大野，
茫茫天地無來者。

渡江雲 癸酉春思

光陰閑過了，海棠開後，天氣怯單衣。
夢魂雖有約，紅豆生苗，終怨十年遲。
無端花信，蕩一池，春水漣漪。
最難禁，倚闌舊處，向晚燕雙飛。

淒迷。酒邊溫語，燈下明眸，待共誰追記。
驚回首，浮雲芳草，遊子天涯。
相逢休說斜陽暮，縱斜陽，猶是春時。
莫忘卻，丁寧百五佳期。

青溪怨 戊辰春思

門閉梨花，相思人在，燕子來時庭院。
為有雲屏寒怯，酒醒虛堂，問春深淺。

任離愁幾許，縱千絲萬縷休剪。
但銷凝，風露中宵，曲曲闌杆憑遍。

忍見窺簾半面。
謾想姮娥何恨，黛眉猶斂。
欲贈清輝一掬，夢渺蓬萊，怎生差遺。
恐無多芳意，又終教，杜鵑啼變。
念當初，顧曲樓頭，他日南歸誰餞。

聲聲慢 為越南華裔難民蹈海事作

槎通碧漢，夢斷神州，辜他海上心期。
飄泊南溟，疏萍身世何依？
怕生鼉龍惱怒，耿無言，相對含悲。
羨燕子，尚追隨節候，萬里歸飛。

我亦江州司馬，也天涯落拓，歌哭今時。
去國情懷，誰人解唱無衣。
昂頭彼蒼曷極，夜茫茫，月色淒其。

待寄與，恐新詞難托哀思。

揚州慢 丁卯北歸賦感

溜滴高簷，潮喧遠岸，曉寒漸逼孤衾。

數疏鐘枕上，著鄉夢何尋。

怪濁酒，敵愁無力，呼燈夜起，獨坐宵深。

念誰同此夕，聽風聽雨關心。

故園秋又，好江山，休去登臨。

怕暝色樓頭，興亡閱盡，憂思難禁。

回首天涯人老，悲歡事，付與蛩吟。

問紅羊劫後，乾坤幾度浮沉。

高陽臺 庚申賦感

涼露中宵，清簫別院，依稀昨夜星辰。

載酒歸來，初衣溜盡京塵。

無心再續揚州夢，任猜疑，杜牧前身。

漫重尋，顧曲樓臺，折柳河津。

桃花依舊隨流水，但武陵經遍，誰問漁人。

不系扁舟，江山何處非秦。

浮雲變滅斜陽外，又西風，世事番新。

感飄零，一度憑闌，一度沾巾。

木蘭花慢二章

一、

燕山夜話再版有感（己未年寫於香港）

又海塵揚了，謗書喜見重刊。

似故人初返，西窗擁燭，續話燕山。

文章從來糞土，盡勾留，淒怨在人間。

讀罷披衣夜起，滿天星斗生寒。

誰言，論定蓋棺。憑何據，判忠奸？

儻遺孤猶在，料應白髮，一夜韶關。

十年興亡人事，卻分明，枕上夢邯鄲。
分付哀弦豪竹，安排千古悲歡。

二、

戊辰春旅次星洲

泛雲槎萬裡，問何處，是歸程？
縱揚塵三淺，江山滿目，依舊蓬瀛。
曲闌背燈斜倚，遍天涯，數盡短長亭。
海上潮回有信，枕邊夢墜無聲。

關情，夜雨最難聽。耐得到天明。
料誰人見得，邊城柳色，如此青青。
鬢絲又添多少，向尊前，不許說飄零。
且把十分春恨，等閒付與倉庚。

滿庭芳 遣懷，次韻二難先生

宿雨初晴，晨嵐乍斂，東風拂檻輕輕。
高樓睡穩，厭聽曉鶯鳴。

剗地柳花飄蘂，憑誰問，池上青萍？

相逢處，美人笑我，兩鬢點霜星。

多生。流落久，交煎八苦，總為深情。

更藍橋舊地，重訪雲英。

回首山青水碧，煙波外，鼓瑟湘靈。

登前路，仙槎待發，與子約同行。

八聲甘州 丙戌和韻微雪齋主人二章

一、

又闌珊花事到荼蘼，春去不能留。

縱紫簫一曲，綠醕三巡，難輟心憂。

見說垂楊憔悴，無處系歸舟。

夢斷雲屏冷，風雨樓頭。

遙想湔裙往事，憶琴前笑靨，燈下明眸。

悔匆匆分袂，未許惜芳柔。

到如今，年光暮矣；問幾時，江水向西流？

憑誰挽，斜陽再起，重照簾鉤？

二、

問百年能有幾多愁？適意便為歡。

恰夕陽留照，霜風吹爽，煩慮都刪。

排闥山光似綺，坐對晚楓寒。

一粲形容老，兩鬢星斑。

分付廊邊蟲語，縱因循節候，休唱衰殘！

況窮通閒事，生死亦心寬。

愛吾廬，南窗寄傲；暢逸懷，吟嘯自悠然。

勸今宵，深情莫負，明月嬋娟。

採桑子 春情，和韻秋靈

小樓一夜瀟瀟雨，

紅豆初開，心意誰猜。

思買芭蕉繞屋栽。

海山萬里人何許，

池外輕雷，階上蒼苔。

春鎖柴門客不來。

臨江仙 次韻江南雨

望得三冬冰泮後，

匆匆幾度春風？

心中雪意總難融。

雁聲斜照外，帆影大江東。

閱盡興亡如走馬，

花開花落相同。

他生未遇此生逢。

吹簫人磊落，題句月朦朧。

仄韻聲聲慢 秋心，次韻暗香如沁

殊方秋又，涼露深宵，鳴蛩四壁如咽。

銀漢西流，檻外雲山千疊。

半生客途流落，似車輪、碾轉難歇。

霜風裡，歎青青玄鬢，一夕成雪。

自忖百年行旅，驀回首、等閒生死何怯？

攜手誰人，共渡紅桑塵劫？

無多剩餘歲月，鎮相對、青燈貝頁。

忘物我，息機杼、不可言說。

沁園春 庚午春致十萬山人

客裡逢公，在海之隅，天將雨寒。

正浮雲蔽日，愁方未艾，落花滿地，春已闌珊。

蒼鬱嵐煙，嶽崎磊塊，羨汝胸中十萬山。

歸來去，待霜毫擲罷，墨瀋斑斑。

知公慣閱波瀾。

任潮生潮滅心自閑。

似武陵漁隱，偶遊物表，玉宸仙侶，小謫人寰。

癡合盟鷗，狂宜嗟鳳，三絕虎頭老更頑。

情深處，繼靈均遺響，著意芳蘭。

漢宮春二章

一、

己未年初移居香港，賦此，用辛稼軒秋風亭韻。

倦客南來，悵關河萬裡，難著蝸廬。

瀟瀟海涯暮雨，景色淒殊。

萍蹤未定，卻依然，衣帽飄疏。

徘徊處，故山北顧，浮雲變滅虛無。

舊夢今宵怎續，念伊人瘦損，茶飯何如？

夜深小樓登望，因月思予。

秋風江上，更阿誰，煮酒烹鱸。

塞雁遠，瀛壖路隔，萬金不抵家書。

二、

已未中秋再用前韻。

秋半江城，恰潮生海上，月到吾廬。

空蒙水天一色，景象奇殊。

流光可掬，認廣寒，桂影扶疏。

更陣陣，清風吹我，胸中芥蒂全無。

我本武陵仙客，悔誤淪塵世，迷昧真如。

遙知舊盟鷗鷺，今夕懷予。

天涯人語，定來年，不負蓴鱸。

且相許，蟬娟千里，此情對酒當書。

鷓鴣天 無題

又作乘風汗漫遊，

何曾快意說恩仇。

多君席上垂青眼，

顧我天涯已白頭。

星斗換，幾經秋，

夢魂慣系舊神州。

故家山水應無恙，

只是心中有所愁。

沁園春 以詞代序《青青故國山》畫冊

客子天涯，攜卷歸來，欣逢晚晴。

正高巒峻谷，青山不老；奔湍飛瀑，流水無聲。

翠嶂萬重，茅廬三徑，碧澗泠泠可濯纓。

師造化，自平章格局，氣韻充盈。

半生詩畫飄零。

念醉夢百年誰獨醒？

更都門彈鋏，非關干祿；滄海乘桴，豈為逃名。

赤縣春回，紅羊劫換，功罪千秋費論評。

今何世，且相期人壽，以俟河清。

鷓鴣天 庚辰題畫六章

一、

竹簟生寒夏似秋，燈殘漏盡有新愁。
早潮帶雨驚鄉夢，曙色含煙上客樓。
情已逝，意難休。杜康不輟我心憂。
逢人莫問滄桑事，且作風波浩蕩遊。

二、

海外徒聞更九州，支機石畔泛仙舟。
料無青鳥傳紅豆。幸有黃花慰白頭。
殘照外，雨煙浮。縱非吾土亦登樓。
西風換盡人間世，木葉蕭蕭異國秋。

三、

萬里山河一望舒，瓊樓玉闕畫清虛。

幾人釣雪寒江艇，何處尋梅陋室居。
容抱膝，即寬餘。更誰彈鋏唱無車。
天涯有個行吟客，燈火圍爐夜讀書。

四、

落盡梅花短笛寒，江南二月雨潺潺。
春風特地憐芳草，曉鏡何能駐玉顏。
聞滴溜，到更闌。殘燈搖曳夢中山。
兒時恍惚曾遊處，不道如今再覓難。

五、

聞道高樓易得秋，夕陽西北是神州。
些時富貴隨風逝，千古興亡逐水流。
家國事，且歸休。迴旋天地有扁舟。
勸君莫負尊鱸美，好約鴟夷把臂遊。

六、

日月風雲甲子新，此生幾見海揚塵。

衣冠故國猶思漢，萍梗殊方不帝秦。

興替事，自相因。梅花夜雪夢中身。

迷陽歌起今何夕，絕筆春秋感獲麟。

沁園春 一九八六年為挑戰者號七太空人同時殉 難而作

噩訊傳來，草木生悲，五洲與同。

歎鳳凰滅度，蓮華佛火，英雄大夢，碧海蒼穹。

今古悠悠，彭殤齊壽，全在浮生一瞬中。

魂歸矣，賦傷春千里，江上青楓。

六龍來去匆匆。料紅牆銀漢槎可通。

但玉蟾常缺，姮娥有恨，金烏不死，誇父無功。

瓊樓玉闕，高寒難耐，蝕骨驚神宇宙風。

今何有，有桂花美酒，酌奠諸公。

滿庭芳 以詞代序兼柬漢雅軒主人

自序

客居加拿大十餘年，承蒙舊友張頌仁先生關愛，特擇戊子新春首次回香港舉辦個人畫展。或是為生活環境所影響，此番展品中，多冰雪山河之作。為寄託興會，故將畫展定名為《冰雪天涯》，並感賦《滿庭芳》一章，以詞代序兼柬漢雅軒主人：

攜卷歸來，畫圖相對，峰巒兀自崢嶸。

川原縞素，朔氣灑邊城。

湖上梅花舊夢，徜徉久，雲水環縈。

憑誰問，天涯冰雪，松柏尚青青？

關情、悲笑共、扁舟十載，風雨曾經。

擬菰蒲留約，續訂鷗盟。

千古心期仍在，希明世，人壽河清。

登臨處，瑤光方霽，故國晚山晴。

百字令 自題罨畫溪山圖十二章

一、

曹騰夢覺，念歸來何世，遊蹤誰省？

匝地樓臺憑望處，百丈黃埃遮影。

合遝車聲，紛囂市語，一例閑消領。

驀然回首，忘機罨畫深定。

胸次丘壑三千，淋漓淡墨，寫就清涼境。

霽雨溪山斜照外，修竹吾廬三徑。

泉籟鳴雷，松濤撼屋，誰解喧中靜？

滿林紅葉，禪關幾杵清磬。

二、

歸來何地，盡王侯糞土，功名陳跡。

閱世不妨留醉眼，朝市變移如弈。

百戰旌旗，連營笳鼓，慷慨揮戈戟。

紛爭蠻觸，個中誰得誰失？

詩酒論盡英雄，鴻來燕去，畢竟乾坤寂。

一枕悠然春睡足，簾外溪山寒碧。

流水無聲，落花有夢，繚繞雲煙織。

畫圖遷想，斜陽垂柳橫笛。

三、

芳菲鵜鴂，又等閒過了，光陰初夏。

檢點紛紜蜂蝶事，小院荼蘼開乍。

一霎滄桑，三春風雨，剪燭巴山話。

榆錢柳絮，消凝永晝亭榭。

卜築百丈泉邊，聲聞俱寂，坐忘驚湍下。

醉裡乾坤無甲子，天際神遊歸罷。

弦指空靈，解衣磅礴，譜就營丘畫。

武陵溪畔，菰蒲漁艇茅舍。

四、

淋漓醉墨，怪雲煙滿紙，居然雅素。

欲馭六龍遊汗漫，彷彿子虛詞賦。

楚甸傳芭，漢皋留佩，飛夢瀟湘浦。

窮荒萬里，磋跎冰雪塵土。

莽蒼大塊山河，黃花翠竹，總是皈依處。

簾外碧桃開又落，但說滄桑朝暮。

太上忘情，真如無相，調入稽琴譜。

斜陽古渡，一聲唉乃柔櫓。

五、

高燒銀燭，照鬢絲凝雪，陰陽競逐。

睥睨興亡天下事，走馬縱橫棋局。

赤縣春回，紅羊劫罷，大夢誰相續？

桑榆未晚，憶中人面如玉。

袖手離合悲歡，襟懷若水，漫譜凌虛曲。

俯仰冥鴻來去路，無數雲巒煙谷。

碧嶂朝宗，明溪環抱，排闥山容綠。

斜陽系纜，前灣獨客吹竹。

六、

燈花枕上，正家山萬里，頻驚寥落。

悚聽荒雞啼子夜，酣睡依然城郭。

星斗闌干，風霜冷漠，猶見南飛鵲。

傳移模寫，煩勞撫指弦索。

嗟訝耿介初心，清臍古貌，華髮簪紅萼。

行遍天涯人未老，自詡丰姿倜儻。

歌遏溪雲，舞低樓月，蝶夢何時覺？

高陽呼酒，胸中壘塊難爍。

七、

荊關畫裡，正山河春雪，紛飛龍甲。

故國梅花誰問訊，策蹇小橋橫踏。

驛柳偏欹，崗松偃臥，猶見殘冰壓。

浮屠高矗，空中鈴語相答。

心憶燈火圍爐，分鉤隔座，素手傳金盃。

短夢惺忪何處笛，留得斜陽一霎。

古寺傳鐘，虛堂隱几，思下殘僧榻。

玉壺初泮，周遭溪澗十八。

八、

百年悲笑，似高軒一枕，黃粱夢久。

寫上生綃誰解意，黯淡邯鄲路口。

萍梗生涯，興亡棋局，百姓真芻狗。

蒼涼畫筆，清明穀雨時候。

恁地耐到天明，燈窗聽斷，點滴階前溜。

花外東風寒料峭，白袷春衫添又。

堤岸停驂，溪橋送客，最憶青青柳。

溪山行旅，青旗野店沽酒。

九、

先生居處，恁層冰磳徑、柴扉深鎖。

擬倩石濤皴破筆，環匝崗巒磊砢。

殘爇燈花，晞微曙色，陋室耽枯坐。

畫圖難寫，早春霽雪江左。

寂寞鐘磬山中，白雲來去，不許元龍臥。

旦暮渥丹成鬢鑠，攬鏡分明今我。

藤榻烹茶，蓬窗擲笛，笑拈紅梅朵。

翛然孤往，海天飄渺歸舸。

十、

東風乍歇，尚陰晴不定，鄉園夢斷。

濠上對床深夜語，耿憶剪燈池館。

曲檻疏煙，方塘微雨，綠漲平橋滿。

呢喃鶯燕，遽然彈指春半。

寒食時侯關山，杜鵑啼處，行客無家慣。

水墨畫圖難寫就，落絮飛花零亂。

煮茗茅亭，敲碁竹塢，誰是清遊伴。

旅途迢遞，數盡離亭長短。

十一、

清秋極目，又高鳴天際，斜排雁隊。

罨畫蕭齋新彩筆，試寫晴嵐寒翠。

紅袖金罍，瓊樓玉宇，都在斜陽外。

蒼涼今夕，倚闌此意誰會。

終古墨面蒿萊，沉吟黃竹，灑盡三生淚。

大澤彷徨呵楚壁，且問彼蒼醒醉。

磊落明河，泱泱涼露，木葉錚然墜。

繁蛩噉噉，萬山黯淡如睡。

十二、

屏山六曲，寫三春暮景，芳菲鵲駛。

遺世忘言誰解意，我所思兮天末。

佳月當樓，清樽在手，肝肺澄冰雪。

倚欄曾見，幾回桂魄圓缺。

指顧倏爾千年，荒涼烽燧，鼙鼓何曾歇。

蔓草離離棲麋鹿，漫認秦宮漢闕。

桃李枯榮，江湖潮汐，留與漁樵說。

蓬瀛咫尺，紅牆碧漢難越。

念奴嬌 次韻冰君登臨滕王閣

千秋舊地，見熙攘車馬，潮流如雪。
昔日殘灰生劫火，幻作蓬萊仙闕。
帝子重來，人間何世，回首堪驚絕。
生民誤盡，江山代出豪傑。

須訝陵谷因循，興亡朝市，明月頻環玦。
盱目凌雲聳廣廈，不夜懸珠炫晔。
錦幄留香，銀燈照罽，楚館笙歌徹。
菰蒲夢斷，誰思煙水寥闊。

附識：

于右任詩雲：龍虎風雲亦偶然，欺人青史話連篇。江山代百英雄出，各苦生民數十年。

納蘭性德《蝶戀花》詞雲：辛苦最憐天上月，一昔如環，昔昔都成玦。

附冰君 念奴嬌登臨滕王閣：

千尋故郡，任雲波飛度，大江翻雪。
檻外孤帆望又斷，欄倚滕王高闕。
碧洗長天，空翱孤鷺，揮手風流絕。
凌霄遙顧，浪花淘盡豪傑。

溯古一介書生，豫章序寶，俊采凝成玦。

筆聚通靈於一刻，墨灑人間瑰曄。

大地飛歌，今朝是我，放眼清秋徹。

曠怡華霽，胸襟那是開闊。

百字令 次韻和陳靄文七疊

一、

重來何代，至亡羊岐路，覓誰蹤跡？

疇昔爛柯人未老，亭畔忘歸觀奕。

旦暮暄寒，江湖潮汐，淘洗前朝戟。

春山若夢，樓臺雲霧俱失。

磊落幽眇琴心，賴傳悲壯，弦指無聲寂。

小隱生涯惟淡素，不羨丹霞金碧。

鷗鷺汀洲，桑麻墟裡，向晚煙如織。

畫圖難寫，數聲漁艇殘笛。

二、

重逢歧路，便晨星磊落，故人心跡。

賭墅圍棋雙袖手，黑白施然相奕。

料理悲歡，平章恩怨，誰射轅門戟？

楚如可去，楚弓無得無失。

偶約野寺殘僧，禪房夜半，移席談空寂。

庵畫蕭齋容抱膝，萬木莽蒼傾碧。

紅豆花開，回文詩就，錦字書難織。

五湖煙水，扁舟何處吹笛？

三、

燕來鴻去，亦譬如春夢，了無痕跡。

傾蓋偶逢成莫逆，把手與君論奕。

踞榻評茶，挑燈披卷，談笑銷戈戟。

三生石上，栩然忘得忘失。

望極畫幅崢嶸，滂沱激溜，夜雨生岑寂。

筆陣森嚴詩境界，萬里清江澄碧。

蒼翠岩阿，迷離雲樹，檻外煙如織。

乾坤寥廓，誰家入破湘笛。

四、

流年逝水，尚勾留幾許，雪鴻泥跡。

我所思兮猶所望，倜儻依然英奕。

寥廓山河，嶽崎胸臆，談笑橫矛戟。

俄頃有悟，夢中蕉鹿無失。

此際潑墨淋漓，凝神諦聽，萬籟俱沉寂。

回省靈台方寸地，百道飛泉懸碧。

楊柳溪橋，粉榆田舍，遠近聞耕織。

瀟湘畫裡，玉人何處吹笛？

五、

年華彈指，但黟然怎忘，斑斕前跡？

憶昔風雲翻黑白，誰詡英明今奕？

烈火戰車，干城甲冑，恣意操刀戟。

飛霜六月，三光黯淡如失。

此夕北顧倉皇，闌杆拍遍，俯仰乾坤寂。

十里長街揚赤幟，瀝血皆凝成碧。

畫虎難成，談貓有憾，罪債堪羅織。

千秋功過，一時壯角哀笛。

六、

何年六月，覺昨非今是，毋忘前跡？

以史為師思過錯，來復千秋煌奕。

擊壤謳歌，垂裳拱治，爐冶銷刀戟。

澄觀返省，毫釐千里能失。

浮雲一瞬回首，春風兩岸，解凍開寒寂。

華夏文明同仰止，台閣莊嚴朱碧。

北極星辰，東山霖雨，環繞霞光織。

雄雞曉唱，五洲騰沸箏笛。

七、

書空咄咄，也油然懷感，前朝遺跡。

檢討百年悲笑事，指掌長安觀奕。

浩劫紅羊，良弓功狗，遺恨三叉戟。

狙公賦芋，焉知何得何失。

憶昔炎日當空，冰山巍巍，舉國俱沉寂。

遊戲廟堂猜馬鹿，祇許看朱成碧。

江上峰青，城頭旗幻，天網恢恢織。

仙人洞口，而今誰奏哀笛。

附陳靄文和章：

江山自古，把豪傑名字，消磨無跡。

抖擻虬髯人去後，一局殘棋誰奕？

雨過敲鐘，潮來送海，怵目沉沙戟。

乾坤指顧，腐儒能說得失？

按拍容易傷心，隔江商女，燈火船頭寂。

試泊秦淮聊作夢，只是金陵餘碧。

蠹墨留香，空杯待滿，往事斜陽織。

天涯安住，獨愁風裡聞笛。

暗香 柳，次韻蒹葭蒼蒼

煙條憔悴，問飄零身世，素心何著？

攜手河梁，攀折繁絲自輕綽。

迢遞青驄去後，都化作，系情紅索。

誰見得，一曲陽關，微雨也搖落。

東閣，幽夢覺。記弄影中洲，解佩留約。

黛眉乍展，春色三分綠芳陌。

縈損柔腸宛轉，浮泊處，萍蹤難托。

又月下，家萬里，客途躑躅。

附蒹葭蒼蒼原玉：

纖腰翠壓，正麗天熏日，新妝才著。

乍見河橋，眉眼依依影猶綽。

萬縷千絲折盡，空念想，天涯離索。

但守得，一樹黃昏，憔悴自搖落。

香閣，夢難覺。望浦渡迢迢，漫展清約。

東君不顧，風裡長教殞塵陌。

愁極而今怎計，應早把，春心寄託。

更夜夜，魂斷處，為誰躊躇。

玉樓春 暮春懷感，四疊次韻十一樓

一、

春光和水東流去，中夜瀟瀟僧舍雨。
若非一樹碧無情，枯坐焉知禪外趣。
思量誰是山河主，難覓半分埋骨處。
啼鵲苦苦勸還家，畢竟娑婆無可住。

二、

三春歲月堂堂去，一霎傾盆寒食雨。
李花開過又楊花，睡起恹恹無意趣。
乾坤莽蕩誰為主，逼仄猶慳容膝處。
蕭蕭陌上走青驄，何物此間留得住？

三、

繁華如夢飄然去，春色三分榆莢雨。

海天蜃市幻樓臺，冷眼橫看何味趣？

傀儡生涯難為主，都到人生淒涼處。

頻權子母孔方兄，此物安能長汝住？

近日家山宦海波濤洶湧盈虛代謝，頗有所感因而三迭之！

四、

瓦飛屋漏由他去，有幸得逢冰雹雨。

乾坤轉側日無多，莫問中年絲竹趣。

鶴歸遼海家何處？城廓人民非故主。

浮槎中土又西洋，看作百年羈旅住。

附十一樓原玉：玉樓春 亂紅

車河織夜雲邊去，兩岸青青愁帶雨。

一山留得看陰晴，山后山前相映趣。

亂紅飛過渾無主，總是銷魂回首處。

當時明月照清狂，喚作白頭春不住。

蝶戀花 暮春為題，步韻雲中化蝶

霽雨池塘映水靜，
微冷山頭，啼鳥遙呼應。
終日閉門辭約請，
自嘲已似髡僧定。

思忖盈虛無究竟。
落拓情懷，突起壺觴興。
半釀酒悲重攬鏡，
鏡中卻見星霜影。

附雲中化蝶原玉：蝶戀花步韻 暮春有寄

紅瘦拋枝鶯語靜，
解道情端，侵曉清光應。
珍重余英重扣請，
今朝漸是風塵定。

物理生涯何所竟，
省識閒愁，偶試陳王興。

似覺靈台趨慧鏡，
不辭夢枕馳駒影。

百字令 自題罨畫溪山圖，三疊次韻李凡

一、

荒寒畫卷，更漠然清冽，孤衷誰省？
慘澹經營徐寫就，剩水殘山光影。
石榻眠遲，茅棚坐久，嵐氣侵衣領。
泱泱零露，歸飛烏鵲初定。

兀的怒瀑崖顛，騰雷千仞，九派開奇境。
三面碧蒼懸峻壁，磊砢接天雲徑。
萬壑啼猿，一川奔瀨，我自禪中靜。
晞微曉色，空山遠寺傳磬。

二、

關河初暝，念天涯人老，夢殘方省。

手撫五弦千里外，送盡冥鴻過影。
荏苒斜陽，蒼涼獨閣，晚吹寒襟領。
長安北顧，浮雲變滅無定。

鋪展丈二生綃，春風橐筆，點染蓬萊境。
我欲攀躋舒肺腑，迴入檀欒幽徑。
澗水鳴鏘，嵐光流翳，鳥語千山靜。
滄桑一瞬，空中搖盪梵磬。

三、

渾涵意象，問八垓何極？發予深省。
我自振衣千仞頂，一覽星霜移影。
嗚咽河聲，蒼茫嶽色，根觸誰消領？
澄心返照，禪關證入初定。

羈泊萬里孤槎，因循漸慣，寂寞清虛境。
冥索鴻蒙思汗漫，徙倚靡蕪芳徑。
往夢沉銷，他生未卜，萬有無為靜。
荒寒罨畫，靈山古寺鐘磬。

滿庭芳 次韻冰君詞長夢謫仙人吟

河山依舊，窅然流水，殘宵露泫繁霜。

昏黃一月，夜色最蒼涼。

會向沉香亭北，邀李白，擊節雲窗。

猶疇昔，脫靴醉墨，彩筆賦文章。

思量。多少事，因循興替，免影駒光。

歎千秋虛度，幾枕黃粱。

傾蓋相逢此夕，君知我，粲我清狂。

期來日，抱琴重到，對酌醉壺觴。

附冰君原玉：

把盞燈前，逍遙月後。和衣醉臥輕霜

笛翔弦亂，一曲絕清涼。

攬月懷中睡淺，夢太白、與我同窗。

花間酌，陶然共舞，滿地碎詩章。

無量。真亦幻，溪山影遠，綺陌殘光

但覺謫仙去，驚醒黃梁。

恍若爛柯一弈，才知我、今夜疏狂。

揚眉笑，月圓再飲，鬥酒恣千觴。

金縷曲 次韻朱八八，夏夜

峽束長橋架。

漫凝眸，雲巒煙岫，明泉如瀉。

我欲山中結廬住，竹簟冰壺涼夏。

風雨外，幽情難寫。

夢醒殘宵更漏斷，想玉姜要繆何時嫁。

繁星沒，明月下。

轉身荏苒群芳謝。

但人生，塵埃逆旅，寸陰焉借。

傾蓋相逢共誰許，簫心劍膽交卸。

與子渡，歡悰良夜。

擊缶高歌須盡醉，喚西流江水歸來罷！

君此夕，憐予也！

揚州慢 初夏賦感

風爽高簷，潮平遠岸，疏鐘幾杵遙傳。
看夕陽西下，又月滿櫺軒。
記亭榭、荼蘼花乍，春歸時節，同聽啼鶯。
念虛堂晝永，南柯一枕翛然。

黃梅雨霽，恁淒迷，綠漲前川。
問紅豆歌殘，碧山人老，心事誰言？
徙倚沉香亭北，消凝處，瓊想蟬嫣。
喚錦箏重奏，迸珠漱玉潺湲。

金縷曲 己醜冬遊婺州志感四章

一、

又見蓬萊淺。
且安排，綈衣蠟屐，筇枝遊踐。

淡墨淋漓閑寫盡，胸中千疊蒼巘。
祇旦暮、茶煙禪簾。
袖手百年悲笑外，看黟然玄鬢星霜染。
物華寂，北風漸。

東流婺水滄波激。
數歸來、沙洲一帶，許多鴻雁。。
八詠樓頭誰與遣，千古興亡如電。
但不語、欄杆倚徧。
荏苒鄉關西日暮，勸今宵莫負村醪醞。
聽更柝，宿山店。

二、

金碧欄杆外。
儻飛來、周圍羅列，玳簪螺髻。
何處清商傳晚吹，簷下叮咚環佩。
但寂寞、千山如睡。
一葉孤帆天際遠，更沙洲寥落瀟瀟葦。
流不盡，婺溪水。

回頭顧盼紅梅蕊。

又西風、疏林古道，逢迎寒歲。

懸瀑玉壺凝雪髓，澄澈冰霜肝肺。

念此意，誰人領會。

叱石仙君歸去後，看夕暉仍照青牛背。

暮靄紫，嶺松翠。

三、

碧岫寒雲鎖。

盡塵埃，澌溪春酒，旅懷礪礪。

衢婺悠悠來二水，荏苒夕陽西墮。

問澤畔，誰歌楚些。

十里清霜蘭浦渡，看漁篝隔岸星星火。

趁夜月，下江左。

琵琶彈徹東風破。

憶筵中、羽衣髯者，隱幾清坐。

顧曲周郎今老矣，飄渺五湖煙舸。

對落葉，沉吟孤我。

葭管飛灰驚歲暮，待空山歸去拈梅朵。

樓百尺，可高臥。

四、

平眺蘭皋綠。

慣尋常、枯榮桃李，浮雲過目。

逆旅百年如旦暮，棋局紛爭蠻觸。

問此際、誰歌誰哭。

月落烏啼閑院落，對梅花獨酌斟醺醺。

眠石榻，夢蕉鹿。

樓頭自坐吹霜竹。

是何人、倚聲相和，廣陵琴曲。

透邇一川清婺水，遙接椿靈仙谷。

又碧嶂、丹崖相續。

泛梗中流歌欸乃，擬歸來卜宅冰壺瀑。

辟三徑，植松菊。

水龍吟 己丑冬遊泰寧上清溪志感

迴旋十里清溪，峯巒矗列青重續。
西來碧瀉，奔雷挾霧，湍流峽束。
對起丹崖，明泉滌臆，白雲怡目。
有襍衣髯者，隱几蘭窟，嵐光照、鬚眉綠。

休問海桑陵谷，感盈虛，空堂來鵬。
斜陽逝水，興亡往事，灘聲如述。
暝色禪關，蒼茫晚磬，黃粱方熟。
待誰人相憶，今宵夜雨，剪西窗燭。

綠意 己丑冬遊泰寧寨下大峽谷志感

羽衣竚立。看流雲館外，古愁如織。
磊珂河山，寂寞台城，鴻蒙斤斧初辟。
寒風搖曳玲瓏玉，似月夜、佩環消息。
想扁舟、白髮歸來，旦暮嵐煙呼吸。

盱目明泉碧瀉，九天落照影，千仞蒼壁。

倚檻何人，鬲指清商，吹徹梅花霜笛。

華年遙憶紅酥手，漫邂逅、醉茶虛室。

聽琅琅、秋雨鳴蕉，夢醒岩霏猶滴。

哨遍 己丑冬游泰寧金湖志感，次韻湘弦絕響

岩峭澗深，潭秘瀑明，洞府垂蘿薜。

趁夕陽，且莫道歸遲。

正消凝個中情味。

倚南枝。

荒塹一雞啼暝，溪舂杵夢村墟里。

待賦罷凌虛，雍容命筆，淋漓元氣滿紙。

看疊嶂西來碧雲馳。

任窈渺湖光入屏幃。

風露娟娟，六塵澄澈，訝然何地？

噫。

月白星稀。

河漢流年逝如棄。

野老猶傳說，西去此間江水。
擬留約惠施，逡巡濠上，夫魚與我相忘矣。
古貌清奇，童顏鬢鑠，坐觀青山差似。
對無題異代錦瑟詩。
聽空谷足音探幽微。
判渾虛、誰非誰是。
滄浪莞爾漁父，鼓枻清歌意。
濯纓濯足，隨緣即可，休問群生醒醉。
廣陵操罷嘯吟兮。
問而今、知音餘幾。

哨遍 己丑歲暮賦感，再次韻湘弦絕響

鴉雀啞暗，關塞寂寥，屋外遮蘿薜。
灑六花，怪春訊來遲。
認暗香疏影情味。
迴梅枝。
寒潮暮鐘遙度，朔風孤泊長干里。
當呵墨精描，南朝畫卷，研金蟬翼細紙。

念逍遙幽谷白駒馳。

正飲雪懷冰臥翠幃。

肝肺澄清，渾涵表裡，雲階月地。

噫。

逝日去稀。

華屋丘墟可遺棄。

急遽流晝夜，不舍有如江水。

聽欸乃瀟湘，滄浪鼓枻，禪心入定庶幾矣。

我與青山，多姿嫵媚，栩然形神兼似。

若雄深雅健太古詩。

更破曉曙光露晞微。

判盈虛、欲齊非是。

忘機相對魚鳥，參證同盟已。

遑論喜慍，平章得失，糟粕醇醪皆醉。

風濤萬頃踏歌兮。

撫朱弦，賡和能幾。

瑞鶴仙 金湖赤壁

趁斜陽碧漲。泛輕舟，閩贛山川俯仰。
濤聲恍瀕洞，橫赤壁、潮汐金湖潏潏。
相逢勿忘。認今宵、明月既望。
顧臨皋亭下，疇昔過予，孤鶴江上。

逆溯冰河雪路，玉壺光中，桂棹蘭漿。
漁歌浩唱。擫長笛，騁奇想。
對微茫、秋水馬牛難辨，彈指千年一晌。
恁須彌芥子，難越乾坤罟網。

摸魚兒 福鼎太姥山紀遊

任蒼茫、嵐煙如織，胸中滌蕩塵土。
歸來白髮童顏叟，登躡蓬壺仙府。
臨歲暮。
還徙倚、斜陽蕭寺關山渡。
疎鐘幾杵。
看海上波濤，往來潮汐，寂寞淘今古。

玄都路、岩岫參差獅虎。

紫蜺飛越瑤圃。

雲車穩縱青鸞馭，我亦神遊太姥。

播羯鼓。

鈞天舞、牢愁合共靈均語。

暗鳴風雨。

待指顧周遭，峰巒萬疊，雜遝趨霞浦。

哨遍 己丑歲暮再賦感，三次韻湘弦絕響

溪迴石奇，台僻徑幽，秘屋披蘿薜。

對霽蟾，莫怪我來遲。

慙消凝冰霜情味。

映南枝。

嬋娟窺簾清影，茶鐺煮夢家千里。

試丘壑鋪陳，平章黑白，居然筆力透紙。

看丹崖翠嶂紫雲馳。

但返照靈台閉素幃。

萬頃琉璃，天光海色，涵虛無地。

噫。

疇昔依稀。

糠粃瓊琚毋相棄。

恍惚吾身在，瀕洞涯涘秋水。

縱錦瑟詞工，濁醪理妙，須臾欲辯忘言矣。

觀百代興衰，尋常悲喜，一枕黃梁渾似。

更臨風橫槊感慨詩。

詡盧扁良醫探希微。

古時方、隨機阿是。

浮雲變滅蒼狗，世事俱而已。

若逢三二知音可也，擊碎珊瑚同醉。

擁衾剪燭夜吟兮。

問人生、今夕何幾。

賀新郎 己丑除夕，乘國泰班機橫渡太平洋上空
超越子午線返加拿大志感

鵬翼翔雲罅。

搏扶搖、滄溟海運，塵埃野馬。

九點齊煙渾難辨，子午陰陽分野。

驀回首、龍荒其下。

萬物不名俱芻狗，念盈虛、消息悠悠者。

融銅炭，共爐冶。

庚寅己丑分區夏。

漫傳柑，辛盤草草，年光逝也。

春色淺深屠蘇酒，兒女燈前情話。

哀與樂、從今拋舍。

紫陌紅塵桃千樹，夢玄都、變幻猶如乍。

知天命，且乘化。

暗香 文成銅鈴山紀遊

銅鈴舊跡，乍雪中索笑，冬心相惜。

俊賞冷香，翠萼寒枝記攀摘。

望裡青田洞府，泮層冰、流澌猶滴。

但遙想、三夏清涼，凜冽漱溪石。

如霧。雲氣織。

正步隘危崖，褰裳千尺。

風雷沉寂。喚起星潭老龍蟄。

零亂倉皇過雨，夕照外、一湖金碧。

傑閣上，有綠袖，玉人擲笛。

疏影 文成 銅鈴山紀遊之二

清遊秉燭。慨邯鄲一枕，黍米方熟。

袖手旗亭，慣見長安，尋常勝負枰局。

暮年惟羨家山美，且漫與、浮雲相逐。

探蒿廬、丘壑幽深，料有隱居仙躅。

寂靜澄湖百頃，峭峰明照影，搖泛空綠。

仄徑千旋，冷萼初花，人在碧闌杆曲。

涯涘瀕洞涵虛境，誰入破、激昂霜竹。

待罨畫、細寫生綃，鋪展水天長幅。

南浦 文成百丈漈紀遊

崇壁亂披縠。辟峻潭、化工神運斤斧。

潑墨繪鴻蒙，揮飛白，百漈明泉傾注。

箏琶沸動，魚龍慘澹風雷怒。

危崖回步，猶燭舉靈犀，俯臨盱顧。

雲封黍谷微茫，有桃花流水，送迎今古。

欸乃入春津，驚重到、莫辨舊時門戶。

玄都夢覺，扁舟歸去歸無路。

海桑塵土，思城闕懸眸，憑欄何處。

摸魚兒 庚寅多倫多春雪懷感

又匆匆，歲華遷序，騫槎海運遊歷。

周天雜遘紛鱗甲，龍戰玄黃蹤跡。

關塞黑。

攬縞素，北溟萬里寒冰積。

羈愁如織。

甚離獸無家，孤鴻失路，大地茫茫白。

韶光逼，錦幄燈紅酒碧。

淒迷春暖遙夕。

催花羯鼓闌珊暮，莫問傾城消息。

猶咫尺。

恍隔世、重逢舊侶誰相識。

清揚梅笛。

看歸鶴雲羅，六花飄灑，百感須臾集。

鶯啼序 歸來，次韻湘弦絕響

飄零海涯獨客，感年華畹晚。

望吳楚，皓月瀟湘，衡陽聲斷征雁。

昊天極、神傷骨折，罡風簸蕩秋魂散。

只垂楊、送盡行人，似留青眼。

蓬山咫尺，殷勤宿鳥，寄瑤章佳段。

歎百年、逆旅乾坤，羈愁似水荏苒。

想瓊筵、鐘鳴鼎食；便縱有、金罍檀板。

總難忘、三徑吾廬，尋常庭院。

平橋曲岸，紫槿疏籬，在浣花溪畔。

猶彷彿、烏衣門戶，相識曾經；巷陌斜陽，舊時社燕。

玄都傳奕，枯榮代謝，種桃道士歸來也，閱興亡、莫放韶光慢。

迷離蜃市，零亂燈火樓臺，雲上仙宮稱羨。

迢遙遠路，黃竹歌吟，冰雪紛瀰漫。

念此際，詞心漸倦。盱目堪驚，淮南雞犬，軒昂霄半。

虛堂晝永，曹騰夢醒，紅桑暘谷窺駒影，算須臾、萬古齊長短。

驀然彈指飄輪，急劫倉皇，能誰恬淡。

金縷曲 庚寅元夕多倫多寄遠

雪域繁燈上。

憑空虛、玄冰未泮，峭寒侵掌。

歷歷樓臺憑孤望，澄澈玉壺清曠。
異習俗，難成佳賞。
迢遞海天河漢外，對團圞、萬裡嬋娟兩。
今何夕，倍懷想。

故山松菊應無恙。
毋相忘、溪梅乍萼，村醪新釀。
顧曲筵中呼驚座，誰識金豐亭長。
倚橫笛，小紅低唱。
留約餞春三月暮，勸東歸、宜趁桃花漲。
攜瑤瑟，泛蘭舫。

翠樓吟 自題陽春白雪山水巨幀

宛轉東風，迷離晚照，葳蕤漸侵青瑣。
天涯猶積雪，矗千疊、冰巒礪礪。
屏居高臥。撫一曲陽春，能誰賡和。
優遊頗。挈攜佳侶，探梅江左。

素裹。明淨山河，正寂寥中夜，月沉星墮。

雲房煙篆冷，伴清磬、松燈微火。

跏趺成坐。試解悟禪機，偶拈花朵。

嘲今我。擁氈煨芋，懶殘差可。

鶯啼序 庚寅春日有所感而賦

靈台靜觀十六，眇唏微前路。

驀回首、初定禪關，諸天飛灑花雨。

遍三界、迦陵妙唱，莊嚴七寶葳蕤樹。

頓澄空萬象，琉璃涵徹寰宇。

覺岸迢遙，阿僧劫海，盼慈航濟渡。

又豈必，起舞乘風，廣寒宮闕高處。

悟盈虛，盡泯喜慍，齊生死，非關離聚。

付今時，紫霧紺雲，云何應住？

驅馳艱苦，泡影電光，百年終逆旅。

漫檢點，征途無數，千轉飊輪，亙古須臾，可曾來去？

洛陽師友，青山歸夢，故人心緒憑相問，貯冰壺，深夜剪燈語。
月圓春暖，依然萍梗飄零，寂寞相如詞賦。

玄都遊戲，蜃氣樓臺，綺麗供延佇。
看西墮，夕陽匆遽，逝水漣漪，此際誰聽，寺鐘幾杵。
消沉魚雁，難傳幽素，酒悲突起蒼涼甚，擊珊瑚，慷慨歌金縷。
從容慣閱滄桑，漢代衣冠，殷墟禾黍。

金縷曲 庚寅春思七章

一、

砭指春寒重。
向潭淵、起騰龍蟄，九天雷動。
嫩柳垂金搖客舍，聽雨聽風誰共。
慙孤月、潛窺屏縫。
隱隱雞聲鳴五夜，怕驚回，萬里鄉關夢。
夢不到，舊田壟。

玄都觀傍桃新種。

正無邊、迷離蜃市，飛樓山聳。

散髮乘桴人去後，海上塵埃壅捧。

幻蒼狗，雲衣堆擁。

見說清明寒食近，灑繽紛、六出冰花凍。

聆黃竹，寸心慟。

二、

望眼浮雲礙。

算年時，等閒過了，踏青挑菜。

堪笑東風無一事，幻出空花萬態。

尚依舊、塵沙人海。

芳草天涯春是夢，但蕭然、夢也春難再。

思轉側，乾坤隘。

歸來遼鶴今何代。

溯河源、消溶雪嶺，涓流如帶。

熠燿驕陽炎嶠外，可有潺湲溪瀨。

問玉宇、澄清誰待。

安得甘霖滋赤縣，歇妄心，還我清涼界。

祈皇澤，深深拜。

三、

煙景蒙如畫。

乍連宵、落梅時雨，廉纖飄瓦。

園外聲聲啼杜宇，勸把吳棉褪卸。

又歸燕、舊家亭榭。

萍絮天涯飛遠夢，數春光，寒食清明也。

無情草，綠平野。

共誰剪燭巴山話。

意難忘、扁舟鷗鷺，斜陽桑柘。

僝僽王孫迷故苑，何處垂楊系馬。

悵離席，吹簫傳翠。

風露欄杆星月轉，怕分攜、花發荼蘼架。

重回首，已炎夏。

四、

一杵寒山磬。

乍清揚、蒼煙搖曳，殘陽沉影。
風信幾番晴不定，白袷春衫微冷。
燭香縷、蘭堂爇鼎。
筇杖芒鞋千步磴，遶吾廬、翠窈檀欒徑。
松石下，鶴盟訂。

繁花落盡滄浪暝。
照澄潭、中天朗月，禪心同證。
江上瑤峰如雪霽，涵徹玉壺光凝。
起烏鵲，喚人孤醒。
擬趁靈槎回黍谷，聽淵雷、試解喧中靜。
憑一攝，入悠永。

五、

綠樹鶉啼歇。
數春光、等閒過了，禁煙時節。
陌上花開歸緩緩，垂老越宮妃妾。
記不起、桃根桃葉。
燕去鴻來應見慣，怕因循、又到紅羊劫。
人間世，多危轍。

殘陽西下山重疊。

莽風煙、愁予渺渺，高寒城闕。

廣廈萬千無可住，幻影海天遙接。

歎倂仄、乾坤如篋。

逆旅百年原一夢，倩何人、證我非莊蝶。

蟲與鶴，共漸滅。

六、

黃鳥間關又。

望平臯、綠蕪千里，晴和明秀。

碧水漣漪瀟浦澈，接軫巍峨山壽。

甚自得，八叉詩就。

無語忘機天地外，浩東風、劣崱登臨久。

蒼昊色，染襟袖。

春雲鬢鬢連高岫。

遶清溪、儼然屋舍，桑麻雞狗。

草店班荆呼故舊，，酬酢椒漿盈缶。

偶相遇，先生烏有。

疏散林泉閑杖履，聽神鴉、社鼓斜陽柳。

攜短舸，下江右。

七、

鐸語斜陽塔。

尚依然、暮寒料峭，東風鳴甲。

吟嘯徐行乘晚照，林鳥啁啾如答。

望前路，千山環匝。

隔岸望門投止處，擬今宵、肯下元龍榻。

思買榜，訪苕霅。

烏衣朱戶銅鋪闔。

數芳菲、金爐篆引，繡簾犀押。

花到海棠人未老，遲暮春衫白袷。

舊池館，綠陰垂壓。

醉哭歧途君莫謫，瘞閒愁、且荷劉伶鍤。

呼豎子，進蠻榼。

哨遍 庚寅仲春，遊美國 Middlebury Vermont Frog Hollow 瀑布歸賦

在彼遠方，幽邃壑中，別有奇天地。

既仲春，百卉競芳菲。

豁平蕪、優悠形勢。

有朋兮。桑柘夕陽閒話，炊煙墟井真情味。

訝莽蒼林叢，恬逸房舍，武陵曾見如是。

繞江村、晴翠泛漣漪。

聽擊壤、謳歌樂熙怡。

石轉星移，傾蓋相問，人間何世？

噫。

渺沔津涯。雲外瀕洞來清泚。

滌下潭千仞，淵雷動、蟄龍起。

且碕岸憑虛，恍然坐忘，神遊寂寞丹霞際。

悟逝水年華，須臾逆旅，置滄海、一稊米。

撫朱弦、目送暮鴻飛。

但隱几、心俱萬物齊。

眺乾坤、非馬非指。

鷓鴣勸客聲切，不若歸鄉里。

青山嫵媚，能令我喜，毋棄蓑衣芒屨。

五湖放棹復奚期？謾逡巡、隨安可止。

哨遍 疊前韻再賦遊美國 Middlebury Vermont

高士隱兮，居嶺一岐，窈窕閑天地。

任四時，蘭桂共芬菲。

繞嵐霏、崗巒奇勢。

最歡欣、遠朋抱琴相訪，淡茶妙理堪重味。

過五柳山家，舟橫津渡，徑途宛轉疑是。

有阪橋芳樹映明漪。

與童孺踏歌盡心怡。

房舍儼然，逝水桃花，恍非塵世。

噫。

汗漫滄涯。憑虛此夕臨清泚。

百里長河上，波濤怒、風雷起。

且西望神州，車輪落日，古愁莽莽來無際。

歎雁陣徘徊，稻粱生計，羈縻處，幾菰米。

但陽春三月烏夜飛。

正碧草連空暮雲齊。

閱興亡、海桑彈指。

圯墟曾幾華屋，回頭人千里。

達觀顧笑，盈虛代謝，往者唐捐如屣。

死生亦幻竟何期？且流觴、遇緣安止。

六醜 庚寅暮春無題之一

縱歸來月下，但滿目、氛埃簾幕。

倚欄聽歌，誰彈金絡索。料理哀樂。

漏盡燈魂冷，問春何在，夢裡春依約。

東風懶啟葳蕤鑰。芳意無多，紅疏翠渥。

川流日夜遮莫。自松濤竹韻，清籟雲壑。

明河斜落。看驚寒烏鵲。

紆樹飛三匝，難寄託。不成電露淒泊。

碧雲家萬裡，回頭天角。

參差矗、玉樓瓊閣。

甚遼鶴重訪，茫然未辨，舊時城郭。

青山老、顏色非昨。

到年時，怕等閒辜負，南中綠萼。

霓裳中序第一 庚寅暮春無題之二

吾行已卻曲。莫使迷陽傷我足。

千載悠悠禍福。歎陵谷消沉，平江成陸。

關山躑躅。任荒蕪，三徑松菊。

星霜易，幾番寒暑，鶴夢又重續。

遙矚。悲歌當哭。更誰共、臨歧擊築。

乾坤萬物碌碌。造化洪爐，感嗟來鵬。

再逢芳草綠。紛八表、憂思似簇。

蒼天老，生民無恙，默默奉香祝。

八歸 庚寅暮春無題之三

錫簫巷陌，鶻啼池沼，亭榭臥榻遙夕。
遊絲系夢渾無據，雙屐等閒孤負，禁煙寒食。
驀地浮雲過雨，破暮靄、蒼巒如拭。
趁霽色，紅豆盈枝，素手正堪摘。

衾被單寒似水，燈魂明滅，薄酒羈愁難敵。
綠楊樓外，餞春來日，滿徑蘼蕪凝碧。
送飄零倦客，瀚海迢遙永相隔。
西洲路，溜塵風帽，朔北歸人，山陽聞夜笛。

角招 庚寅暮春無題之四

遁荒久。隨緣杖履飄疏，濠上招手。
白雲橫碧岫，曲水繞村，桑柘雞狗。
飛花戶牖。有幾隻、幽禽鳴逗。
眺盡平蕪芳草，憑欄送了斜陽，是春歸時候。
依舊。夜簷滴溜。殘燈煮夢，閒話青梅酒。

澀詩敲未就。細雨邊城，萋萋楊柳。

珊瑚擊缶。倚尺八、河梁歌又。

此別鷗盟故友。問何住？海之西、天之右。

征招 庚寅暮春無題之五

潮回湖上滄波冷，晚香尚餘船尾。

隨意入深幽，共迷離煙水。

東風斜照外，望相隔，幾重蒼翠。

莽蕩乾坤，側身無地，感嗟秦醉。

故壘。幻浮雲，山中事，關心遠遊人最。

迤邐路千盤，聽樵蘇歌吹。

碧桃開復墜。料應憶、漢臯環佩。

問誰可、蠟炬高燒，伴海棠春睡。

宴清都 庚寅暮春無題之六

寂寞春歸處。消永晝、獸爐長爇香炷。

參差燕子，飄零柳絮，謝家門戶。

樓中倚檻人老，對歷歷、晴川草樹。

久不聞、擊壤歌謳，枌榆裡社簫鼓。

舒眸眺盡蒼茫，山河體勢，箕踵龍虎。

潮生碧海，雲浮紫岫，古愁臨汝。

繽紛蜃市城闕，又禁受、斜陽幾度。

更那堪、斷續鶉啼，天涯客路。

哨遍 庚寅初夏感賦

近日讀網友文章，至「收放自如」一語深有感觸。

佛家一語錄嘗曰：「隨緣不變，不變隨緣。來是偶然的，走是必然的。所以你必須隨緣不變，不變隨緣。」龔定庵詩：「偶賦凌雲偶倦飛，偶然閑慕遂初衣。偶逢錦瑟佳人問，便說尋春為汝歸」一首七絕連下四處「偶然」，被靜安先生痛詆：「其人之涼薄無行，躍然紙墨間」。予思，若只有「隨緣」而無「不變」，隨緣亦成為染緣了。佛家經論云：「得失從緣，心無增減，喜風不動，冥順於道，是故說言隨緣行」，櫟括此意遂填此《哨遍》一闕：

塵蛻幾時，蘭漿叩歌，舉罍酬公壽。

笑鸚鵡，修短各優遊。

任天機、吹萬在宥。

遂初衣，錦瑟美人相問，尋春為汝長廝守。

適賦罷凌雲，倦飛思住，彼蒼璀璨星斗。

騫回頭、一弈已千秋。

處逆旅、大塊寄蜉蝣。

造化無私，陰陽陶冶，土骸葛狗。

休。福禍焉求。清風明月曾吾有。

騎鶴寒江上，記不起、從前酒。

便寂寞波瀾，噤聲鐘磬，神州英氣消沉久。

盡殘照關河，文衰八代，能誰翊，斲輪手。

睥遺金、仲夏衣羊裘。

趁暮雨，飄零泛孤舟。

且乘流，安知歸否。

隨緣恬淡緇涅，此心終如舊。

長亭古道行人送盡，惟剩依依垂柳。

年光逝水路悠悠。

問白雲、何心出岫。

三姝媚 庚寅夏遊魁北克 Montmonency 大瀑布 賦感

扶搖羊角走。似飛來遼鶴，葛天遺叟。

接軫山蒼，恰遽然排闥，翠微襟袖。

一旅吟魂，疑重到、昆侖山口。

百派流泉，千仞雲崖，雪潭龍吼。

萬里鄉關回首。念故國塵埃，幻移蒼狗。

桺桺量金，盡蜃氛樓闕，逼凌星斗。

黑白言貓，工聚斂、時兮陽九。

賦罷長歌難遣，烏烏擊缶。

南浦 庚寅夏重遊加拿大千島湖

欸乃聽漁歌，甚天涯、別有桃源仙境。

斜日映西洲，憑欄處、千島晚潮初定。

垂楊堤外，菰蒲一櫂滄浪艇。

瀕洞雲光涵翠碧，萬頃波平如鏡。

遙思水國江南，只依舊濤聲、消凝晝永。

息壤半枯焦，菰蒲盡、誰憶那時煙景。

湖山漸暝。熏風吹老蘼蕪徑。

澤畔搴芳人去後，汀上鷗盟誰訂。

水龍吟 庚寅夏重遊加拿大千島湖再賦

綠楊千島沉陰，韶華又過荼蘼架。

驅車古岸，漁村水墅，長灣度夏。

別徑疏籬，菰蒲深處，煙光如寫。

怕湘皋解佩，芳菲冷落，覓麟鳳、求諸野。

心憶江湖沚社。睨千秋、古今誰者。

風濤一舸，海天萬里，飄然歸也。

夢雨斜陽，懷人此夕，養蘭亭榭。

問誰家笳吹，月明星慘，共蒼涼夜。

西河 庚寅夏日 Quebec City 懷古

消溽暑。相逢鷗鷺汀渚。
煙波一舸逐鷗夷，挈攜俊侶。
且留冷眼閱興亡，青山明日何處。

叱風雷，峙龍虎。丹霄星宿參伍。
滄江峽束起高崖，連雲舶賈。
百年海客自西來，森然鎗炮開府。

布衣閭里訪酒市，趁斜陽、評略今古。
感慨霸圖塵土。
只堞樓古墅長河潮汐，畫角聲中邊城暮。

渡江雲 庚寅夏日 Saint Lawrance River 紀遊

輕車千里路，江山覽勝，遊歷共披圖。
晚潮平浦溆，夕照歸舟，鷗鷺隱菰蒲。
風濤遠去，迴碧空、萬頃涵虛。

千古事，蒹葭晞露，綠樹喚鷓鴣。

何如。金罇在手，擊碎珊瑚，試圍棋賭墅。

消溽暑、長灣度暝，涼簟冰壺。

故人音訊遙相問，幾時卜、修竹吾廬。

憑懷想、芳洲貺子瓊琚。

沁園春 庚寅夏日渥太華懷古

萍梗遊蹤，萬裡重來，雪都龍庭。

看郁金花馥，郊園秀麗；紅楓旗展，陵闕鮮明。

夾岸峰青，繞城潮闊，趨海東流江有聲。

風雲起、儼山河帶礪，雄鎮宸京。

當年鏖戰曾經。笑英法、霸圖蠻觸爭。

喜康衢擊壤，熙陽含煦；堯天暇豫，弦管升平。

此夕何堪，神州西顧，無限攸攸家國情。

忘機矣、共盤桓鷗鷺，高塔鐘鳴。

大酺 庚寅渥太華紀遊

出石城東，憑欄處，七載清遊如幻。
斜陽楓嶺外，撫蒼松相憶，雪原陵阪。
古壘天低，長河雲闊，嘹唳南飛征雁。
須臾春冰泮，便垂楊飄絮，鬱金香滿。
正緩緩歌詩，踏青歸去，萬花湖畔。

荼蘼風雨晚。更誰許、高臥元龍館。
憐此夕、簾鉤鳴鐵，井渫浮瓜，訴心語、羈孤宵半。
水檻閑亭榭，噴金獸、迷離煙篆。
墜涼月、沉箏管。
沙鷗睡穩，應念拏芳人遠，晨鐘早潮斷岸。

注：世紀之交，餘嘗居住渥太華東郊七年之久

換巢鸞鳳 再賦庚寅渥太華紀遊

雲路歸程。恰穹窿又見，雁陣南征。

錦楓明高壘，杜麗綴神京。

長河波定晚潮平。

古台亂蛩，斜陽堠亭。

徜徉久，記幾度、紫簫吹暝。

孤影。鬢月冷。

回首默然，迢遞鄉關迴。

萬疊蒼山，故園何處，叢菊吾廬三徑。

懷遠憑欄數秋星，美人無寐涼宵永。

天涯鐘，一聲聲、報曉誰聽。

注：渥太華向有「鬱金香城」的美譽；鬱金香，學名 **Tulipa**，英文 **Tulip** 中文可翻為「杜麗」

揚州慢 庚寅 Kingston 紀遊

楓槭猶青，蘼蕪未老，涓涓涼露秋初。

趁清明曉色，訪水國雄都。

舶千舸、蒲灣深港，倚舷時見，沉雁飛鳧。

渺煙波東接，空蒙千島平湖。

登臨懷土，盡西風、歸思尊鱸。

念呵壁彷徨，湘累澤畔，斑竹蒼梧。

萬里迢遙雲路，逢愁侶、暮雨相呼。

怕新寒侵夢，淒其後夜啼烏。

瀟湘逢故人慢 題畫次韻越女鏡心

披圖孤峙，觀淋漓水墨，寫就雲窩。

曉峰列松螺。繞千疊青嶂，浩渺滄波。

茅廬小小，倚軒窗、矯首庭柯。

擬依傍、晚香籬菊，琴書且自磨跢。

攜佳侶，橫短笛，羨鴟夷、五湖煙舸風蓑。

悵不見清狂，便敲碎唾壺，慷慨良多。

金樽對月，儻吾醉、吾為公歌。

人間事、幾番桑海，洞庭馭鶴三過。

醉翁操 示內子

清溪。漣漪。蒼陂。草披離。如絲。誅茅既滋芷三畦。搴芳今有人兮。
與世遺。噫，雉朝飛。鼓之琴聲聞者悲。

此情若水，溫語山妻。勿違緇涅，早遂初吾素衣。煙舸風蓑江湄。
約子白頭相依。沙洲鷗鷺知。晨光方熹微。噫，對坐忘機。羲皇何代
焉可期。

醉翁操 山居賦感

貽予。瓊琚。仙姝。碧山居。何如。池塘水清植芙蕖。臨軒修竹扶疏。
閑有餘。噫，子非魚。亦相忘江湖以濡。

煦和暇日，來客唏噓。駕言稚子，疇昔曾焚萬書。蘭蕙生門當鋤。
代謝演乎氈毼。流光馳白駒。鄉園將丘墟。噫，舉世包苴。揚波奚免
哉飲釀。

醉翁操 感悟

煙嵐。追探。叢蠶。楚之南。雲崦。山青染吾老須髯。甚深禪意初參。
頓洞諳。噫，過春三。法雨天花兮乃瞻。

歲云暮矣，蒼翠松杉。迴然歸趣，湛湛兮江水藍。上有楓兮幽潭。
供寶香兮旃檀。響悲音悉曇。清澄兮心龕。噫，萬象虛涵。致遠可以
居巔巔。

醉翁操 庚寅題畫

嶙峋。含渾。披皴。繞浮雲。氤氲。閑來畫圖寫江村。桃花流水當春。
誰問津。噫，可避秦。卜居惟德宜與鄰。

飲冰澡雪，貞我馨芬。仰隨高蹤，無怨吾生有垠。永夕綢繆思君。
憔悴行吟躬身。過滄浪濯塵。彷徨兮湘濱。噫，子也何人。彼接輿者
嗟獲麟。

行香子 庚寅偶感十二章

一、

絮果蘭因，虛幻前身。

換滄桑、幾度昏晨。

秦皇漢武，懵懂煙塵。

對燈前花，水邊月，鏡中人。

維舟彼岸，徙倚江濱。

且隨風、偶爾飄茵。

等觀貴賤，蟣虱龍麟。

在天香樓，桃根渡，綠楊津。

二、

七十華巔，姑射居焉。

對嬋娟、鋪展雲箋。

隨機罨畫，不計嬋妍。

付一枰棋，一船月，一溪煙。

清澄心海，蓮葉田田。

鎮無由、風動心幡。

偶然興會，得意忘言。

是靜中境，圓中覺，定中禪。

三、

世路蠶叢，韜劍藏弓。

息風雷、淵藪潛龍。

吾廬誰小，傲嘯從容。

種五株柳，千竿竹，半坡松。

桑榆逼仄，皓首今翁。

竟何堪，得失雞蟲。

登山會覽，意氣如虹。

看巖霜降，隕星墜，大江東。

四、

結屋嶙峋，燕侶天民。

艤扁舟、楊柳春津。

丹青陶寫，丘壑煙雲。

運隄麋墨，淨皮紙，亂麻皺。

死生契闊，思念殷勤。

最難忘、聞笛宵分。

無言相對，攜手佳人。

正燈如豆，香如篆，月如銀。

五、

蒼靄平林，朗月高岑。

念君恩、風絮浮沉。

迢遙去路，料峭寒衾。

憶西窗燭，巴山雨，錦江潯。

逡巡澤畔，憔悴而今。

輟憂思、抒訴敬嶽。

仰瞻其美，賡和心琴。

唱五噫歌，四愁詠，白頭吟。

六、

霽色籠明，何處倉庚。
熱旃檀，斂衽彈箏。
虛堂端坐，六曲雲屏。
寫夏山翠，暮山紫，曉山青。

漫傳鳩語，不定陰晴。
過藍橋、可遇雲英。
樓船橫笛，煙水江城。
上靈岩寺，桃花塢，醉翁亭。

七、

舊夢飛揚，海水紅桑。
十年來、琴劍昂藏。
馨芬蘭菊，杯酒徜徉。
但關山寂，西風起，客途長。

紫簫吹暮，楓槭丹黃。
在江湖，魚水相忘。
行吟七澤，放棹三湘。
住碧雲天，聽雲館，白雲鄉。

八、

窈窕春嬌，貺汝瓊瑤。

意難忘、錦瑟初調。

峭寒孤館，紅豆生苗。

聽殘更柝，蕉樓雨，柳橋蕭。

水流花落，冥想丹霄。

問何如、山走雲飄。

悲心慧眼，恢廓空寥。

閱鷗夷船，孤山鶴，子胥潮。

九、

平楚鳴鳩，宿雨初收。

勸登臨、念遠銷憂。

古今一瞬，天地悠悠。

上黃金台，滕王閣，大觀樓。

高陽呼酒，三五朋儔。

卜吾生、莫問休囚。

山蒼似海，屋小如舟。

正霜風緊，征鴻唳，晚天秋。

十、

細雨桑麻，三徑人家。

憶當時，閑坐清茶。

東疇既耜，薺麥初花。

正雁南翔，春將半，柳藏鴉。

黃埃巷陌，五劇雷車。

漫多情、紅袖箏琶。

夢魂漸慣，碧海飛槎。

任天涯遠，長河落，曉星斜。

十一、

荳蔻情懷，悲笑疑猜。

過東風，細雨銅街。

花圍錦幄，酒上香腮。

恰卸雲妝，燒紅燭，彈金釵。

而今戲破，野馬塵埃。

任天真、竹杖芒鞋。

隨機冥想，虛室心齋。

更墮功名，忘生死，放形骸。

十二、

日月飛梭，宿鳥南柯。

對衰顏，明鏡摩娑。

憂思難輟，浩渺長河。

正詩如潮，心如水，意如波。

黍離宮苑，荊棘銅駝。

猛回頭，千古頃俄。

江山依舊，雨笠煙蓑。

剩莊周夢，廣陵散，接輿歌。

醉落魄 庚寅短令隨筆之一

笑拈梅萼，東風微啟蕤蕤鑰。

莫辭會飲黃金爵。

醉倚乾坤，渾屯疑重鑿。

戛然墜地森芒角，明河耿介星斜落。

悠悠誰奏中宵龠。

夢汝來遲，疇昔橫江鶴。

謁金門 庚寅短令隨筆之二

中宵笛。旖旎向人如泣。

萬裡關山風雨夕，扁舟雲夢澤。

合什跏趺面壁。何處虛空吾宅。

一統乾坤容抱膝，回頭天五尺。

河傳 庚寅短令隨筆之三

微冷、煙景。憶江南。過了春三。

客帆。乘風西去天水藍。遙瞻。夕陽蒼岫銜。

別夢今宵情獨苦。回風舞，留佩瀟湘浦。

不成歸，且徘徊。迷離。碧雞中夜啼。

夜遊宮 庚寅短令隨筆之四

此夕登高望岱。莽今古、滄桑何代。

弱水三千誰可待。

馭雲槎，濟星河，通碧海。

偃蹇迷陽礙。黯綿羃、萬山沉靄。

百卉飄零春不再。

失涵虛，意芒羊，天地隘。

梅花引 庚寅短令隨筆之五

日如梭，月如梭，銀漢飛光寒意多。
鏡重磨，鏡重磨。芳靨若花，回眸雲鬢皤。
歸來千載遼東鶴。會須醉飲黃金勺。
擊壺歌，擊壺歌。煙水一篙，莫教公渡河。

河瀆神 庚寅短令隨筆之六

濠上故人居，紫槿初花門閭。
溪橋流水夢華胥，悠然來往遊魚。
悲笑百年皆逆旅，此夕月明洲渚。
意欲乘風歸去，驂鸞誰馭飛舉。

雨中花令 賀鑄體 庚寅短令隨筆之七

疊嶂西馳雲合遶。引四面、山青排合。

倚遍闌杆，端然吟嘯，穀籟相鳴答。

逆旅客、埋愁宜荷鍤。恁睥睨、滄桑一霎。

古剎傳鐘，暮溪沉靄，僧補斜陽袂。

夜行船 庚寅短令隨筆之八

隱几軒窗憑獨坐。過晴天、幾團雲朵。

代謝光陰，縱橫朝市，荏苒夕陽西墮。

俄頃中宵聞楚些。蕩精靈、澤邊江左。

寂寞樓臺，幻虛花月，隔岸數星漁火。

傾杯令 庚寅短令隨筆之九

白袷單衣，垂楊客舍，念遠放眸平野。

三月春風花乍。千里紅濤如瀉。

喧闐簫鼓粉榆社。記依稀、斜陽桑柘。

而今寂寞回首，暘谷駒陰過罇。

清平樂 庚寅短令隨筆之十

逡巡千載。齷齪真難耐。

故國河清焉可待。披髮乘桴滄海。

祇今麋鹿池台。依然翠柏青槐。

朝市興亡如弈，浮沉野馬塵埃。

好事近 庚寅短令隨筆之十一

灘瀨咽溪聲，清越誰彈箏調。

松石我來欹臥，看殘陽蒼嶠。

峭寒初夜冷秋風，窈窕月相照。

欸乃煙波歸櫂，入菰蒲深渺。

西江月 庚寅短令隨筆之十二

掩映峰巒入畫，琤琮濤瀨鳴琴。

清溪九轉閬風岑。白石臨流堪枕。

螭首簪花顧影，秋心呵壁沉吟。

拏舟訪子碧潭潄。襟袖幽馨如沁。

菩薩蠻 庚寅夏日雜感二章

一、

銀屏燈映琉璃碧。繁花浥露流光濕。

惜取少年時，誰歌金縷衣。

洪荒生馬角，人事渾非昨。

何日玉關回，笑拈紅萼梅。

二、

幾番圓缺玲瓏月。鄉心最憶梅花雪。

歲晚莫登樓，難禁羈旅愁。

茫茫天地闊，來去人蹤絕。

夜半更魂銷，關山何處簫。

沁園春 辛卯新春感賦四章

一、

時序當春，白頭遷客，攜卷歸來。

但喧歌不夜，觥籌錦幄；繁燈如綴，車馬銅街。

蜃市千圍，蓬瀛三淺，幾見月明滄海涯。

逡巡久、豈春歸辜負，竹杖芒鞋。

晞微虛室心齋。驀回首、砉然渾沌開。

恰紅梅破萼，風華綽約；青山入夢，氣象崔嵬。

系櫂離亭，聽濤孤館，何處子陵煙雨台？

乘桴去、且隨機雲水，磊落襟懷。

二、

相對無言，某水某山，吾亦無猜。

況淋漓筆墨，昂藏丘壑；逍遙意趣，蹕絕氛埃。

變化盈虛，平章黑白，一念渾涵周九垓。

憑誰說、悟菩提非樹，明鏡非台。

忘機脫略形骸。倚泉石、解衣磅礴哉。

更環圍鬱鬱，晨嵐夕照；仰瞻止止，翠柏青槐。

聽雨難期，餞花有約，也道先生歸去來。

春如舊，正綠楊池外，隱隱輕雷。

三、

矯首遐觀，悠然流憩，避地徂徠。

過炊煙牧笛，夕陽墟裡；柳陰漁艇，春雨樓臺。

岐路停車，非時荷鋤，何處青山愁可埋。

行歌罷、祇清狂依舊，遲暮吾儕。

前番詞客歸來。笑華髮、紅顏誰與偕。

正燈昏枕畔，天涯夢繞；鶯啼江左，陌上花開。

偈仄蝸居，塵封蛛網，凡鳥豈宜棲蒿萊。

乘桴去、擬滄浪濯足，坐忘虛齋。

四、

客子奚歸，憔悴行吟，徙倚湘隈。

歎投荒念亂，浮沉桃梗；殘寒乍暖，進退人材。

葛狗生民，泥犁國土，人意天心相睽乖。

燃犀看，恐魚龍起蟄，勃發淵雷。

層巒疊嶂馳來。要坐對、軒窗西面開。

總風風雨雨，不堪春老；朝朝暮暮，寧為花呆。

屋小如舟，山深似海，祇取白楊三徑栽。

愁何在、任迷離蜂蝶，夢上金釵。

金縷曲 辛卯春思十二章

一、

霹靂排山動。

問何求、媧皇嵌補，九霄雲洞。

萬丈貪嗔燎原火，俄頃遊離地縫。

剩多少、頽垣荒塚。

亙古沙蟲猿鶴怨，最傷心、海上風濤湧。

驚一枕，聚槐夢。

臨淵履薄千般重。

百年來、人天睽闊，觸蠻交訟。

蜃市樓臺連雲起，孑孑群生懵懂。

執紅卷，無疆猶頌。

霽雪夜寒三月暮，怯衣單、凜栗雙肩竦。

穹廬仰，玉盤凍。

二、

海水搖天罇。

騫然間、陰陽倒接，敲嶽遙夜。

萬里青溟波濤湧，朔氣橫排萬馬。

摧如紙、金湯高壩。

疇昔繁華歌舞地，閱滄桑、輾轉成衰謝。

冰與炭，同爐冶。

諸君記否屠鯨者？

付其中、因循緣起，皎然如寫。

指日北非烽煙起，離獸哀鴻遍野。

彼黎庶、誰祈多嘏？

殷望良知心在疚，仰蒼穹、清淚驚湍瀉。

恣殺戮，不祥也！

三、

碧海沉平陸。

乍回頭、同昏八表，狂濤山矗。

曾道莊周無端語，杯水坳堂舟覆。

驀彈指、百年轉轂。

見說爛柯亭下客，置枰棋、寸土分蠻觸。

拼一醉，歌當哭。

春光曳影鬚眉綠。

但飛觴、邀誰痛飲，古愁千斛。

誤鑄九州黃金錯，江漢西流莫贖。

警災眚、北軒來鵬。

不若鬪圓明月夜、對嬋娟，倚遍闌杆曲。

休再聽，漸離築。

四、

酹酒歌慷慨。

正洪荒，玄黃龍戰，怒濤澎湃。

百卉凋殘東風冷，六合陰霾鬣鬣。

春三月、問春何在。

多難萬方臨急劫，泛波瀾、人或為魚蟹。

易陵谷，變滄海。

相逢始信乾坤隘。

但流離、浮雲睚眦，恩仇同載。

碧漢紅牆猶咫尺，只隔水天衣帶。

豈得似、偶然傾蓋。

澤畔蹉跎呵楚壁，訊蒼蒼、深意誰能解。

閱當世，幾成敗。

五、

板蕩罡風橫。

送殘春、飄零花雨，雞鳴猶暝。

下土沉浮仍秦醉，誰起群生酩酊。

君不見、燭龍昭炳。

如拱紅桑溟漲外，怯登臨、海上蓬山頂。

彌弱水，夜悠永。

樓高百尺憑孤醒。

望神州、菰蒲何處，五湖煙艇。

代謝盈虛徒爾爾，指隙流波過影。

功與罪、千秋難省。

月落烏啼天地迴，度漣漪、一杵寒山磬。

誰共我、入禪定。

六、

鄉國關心久。

看樓臺、迷離蜃市，侵凌星斗。

底事書空徒咄咄，豈必鳴鳴擊缶。

且隨分、濤飛山走。

海上塵沙颿電笑，變倉皇、龍戰滄溟又。

天地坼，風雷吼。

臨流欲酌無多酒。

更誰憐、烽煙桑柘，黔黎葛狗。

莫問春歸歸何處，依舊黃鸝翠柳。

吾廬在、白雲高岫。

抱膝東軒君所見，一清腹、鶴髮青衫叟。

人不識，可離疚。

七、

遼鶴棲華表。

最蕭條、高樓短笛，東風殘照。

花近酴醾春將盡，依舊春寒料峭。

問誰解、鵑啼何調。

歌吹升平徒曼衍，戰玄黃、驚見蒼龍矯。

繁華夢，幾昏曉。

悲歡百感臨高嶠。

盡仙源、淮南雞犬，海塵揚了。

昨日青山今黃土，千古同時入眺。

興與廢、終歸虛縵。

回首故園松竹在，擬相邀、佳侶斟馨醪。

對明月，且吟嘯。

八、

六合珊瑚網。

笑紛爭、蝸居蠻觸，敢言寬敞。

千古江山興亡事，都付隨機意想。

渾無據、筌魚俱忘。

細雨烏篷眠短舸，水粘天、遠浦迷菰蔣。

問誰是，五湖長。

斜陽草樹烏衣巷。

算年年、尋常燕子，春來秋往。

折盡柳絲千萬縷，綰住春光一餉。
漫留得、春花三兩。
見說春歸春還在，過青溪、多謝桃根漿。
自編曲，小紅唱。

九、

清角催遙夕。
看縱橫、金戈鐵馬，長安如奕。
歷罷恒河塵沙劫，青草池塘自碧。
怕重聽、征鴻嘹唳。
海上月明潮有信，變滄桑、畢竟歸沉寂。
當直面，十年壁。

五湖煙雨閑蓑笠。
待春歸、扁舟莫問，桃花消息。
乘化隨流清溪路，此去蓬萊咫尺。
總難忘、山中泉石。
欲侶赤松攀劣巔，覓真吾、不負登高屐。
撫弦索，仰雲白。

十、

綠樹花姿妥。

又差池、于飛燕鷁，東風江左。

潑豔清波生初日，如冪春陰乍破。

與相並、蕨蕤青瑣。

庭院深深垂繡幕，盡芳菲、都被重門鎖。

鼎煙燼，蠟燈炧。

情懷平淡猶今我。

看滄桑、劫灰難辨，昆明餘火。

杜若凋零靈均老，夜半誰歌楚些。

問何意，笑拈梅朵

留約燃犀星潭下，聽淵雷，且作跏趺坐。

送明月，西山墮。

十一、

世事渾非昨。

送芳菲、陰晴不定，亂啼姑惡。

十萬修羅凌帝座，如幻山河鎖鑰。

總難恃、金湯城廓。

滄海橫流驚沉陸，更淒迷、風雨藏舟壑。

天與地，疑重鑿。

歸來莫忘湔裙約。

最關情，吹簫橋畔，年年紅藥。

一夢曹騰春睡覺，人在斜陽院落。

望千疊、參差樓閣。

料峭殘寒侵簾幕，念飄零、夜半南飛鵲。

對明月，誰橫槊。

十二、

獨閣高凝佇。

遍天涯、關山偃蹇，飄零衫履。

百代滄桑紅羊劫，指顧須臾逆旅。

閱多少、興亡離聚。

桃李紛紛新亭榭，對芳時、起舞歌金縷。

千杯酒，酌愁侶。

賓鴻過翼流光遽。

化浮萍、大江南北，濛濛飛絮。
聞道東溟天柱折，坐對青燈不語。
共誰聽、連宵風雨。
花到荼蘼春歸去，送春歸、殘笛斜陽渡。
春歸了，覓無處。

法曲獻仙音 次韻夢煙霏

禪悅輕安，菩提淺證，漸入維摩初定。
業海波寧，靈山會歇，三千大千俱靜。
仰彼岸、慈航渡，金蓮燦光景。夢中影。

映星潭、一泓寒水；傳鐘磬、寶鼎煙微香冷。
無住且生心，忘言筌、般若觀省。
指月拈花，坐跏趺、煩惱銷盡。
悟真空妙有，澄澈渾涵圓鏡。

紫萸香慢 朔北餞春，次韻夢煙霏

望蒼然，平皋接軫，倚樓不見山青。
正長河冰泮，夕陽霽雪龍庭。
去路空無來者，遍彷徨離獸，野燒荒城。
悵曹騰夢醒，薄酒慰羈孤，度夜永，此時念卿。

邊聲。簞簞傳驚。星慘澹，月朧明。
記溪亭折盡，黃金柳縷，誰綰深情。
但隨稻梁蹤跡，似歸雁，過寒汀。
最傷心、九原芳草，暖風吹綠，回首春已飄零。春遣未成。

金縷曲 再次韻塵色依舊三章

一、

芥子須彌重。
見尋常、東風馬耳，心幡搖動。
不待花開春先老，代謝形骸與共。
更誰念、春歸無縫。

六合陸離渾一統，悵關河、酩酊鈞天夢。

懵懂月，照秦壘。

相思紅豆年年種。

憶良宵、徘徊清影，吟肩輕聳。

報有明珠生海上，塵土桑榆塢墜。

聽夜雨，殘燈誰擁。

黃竹悲歌歌未徹，望瑤池、積雪層冰凍。

來吊古，幾哀慟。

二、

境靜心無礙。

更殷勤、晨昏料理，三畦蔬菜。

淡墨淋漓南宮筆，難畫閑雲意態。

又何必、浮沉人海。

七尺蕭齋懸短榻，勸先生、晝夢華胥再。

容抱膝，莫嫌隘。

幽居寂莫誰能代。

愛風光、蟠龍棲鳳，山河襟帶。

江上誅茅人不識，垂釣深潭淺瀨。

渡溪岸、扁舟橫待。

破帽遮顏過鬧市，避塵囂、休近修羅界。

憫黔首，宜千拜。

三、

煙水雲山畫。

便歸來、剡溪一帶，採椽青瓦。

晚系扁舟斜陽纜，浦溆風帆乍卸。

又燕子，雙飛池榭。

默照忘言登彼岸，向壇前、微笑拈花也。

離離草，綠郊野。

對床風雨挑燈話。

到三更、空堂酒醒，我思甘柘。

海運神遊超像外，愧漾塵埃野馬。

吾無欲、歌鐘樽俎。

春殿鷓鴣俱已矣，夢邯鄲、誰臥薔薇架。

衣縕褐，可冬夏。

醉翁操 奉題姑蘇雲鶴蘭花畫冊

春深。江潯。鳴禽。眄重陰。幽尋。湘累獨醒兮何處，澤畔憔悴行吟。
攀九岑。噫，再登臨。世路迢遙兮崎嶇。

等閒閱盡，陵穀浮沉。有蘭三畦，夙夕綢繆子心。紉佩馨吾中襟。
一曲酬乎知音。吹竽兮鼓琴。思君兮至今。嘻，陟彼南林。與君松下
鋤茯苓。

蝶戀花 辛卯初夏感遇九章

一、

辛苦繭居難化蛹。
八面紅牆，千疊屏山竦。
網罟交加無半縫。
廿年未革錐心痛。

舊事遽然如昨夢。

寂滅知聞，六月嚴冰凍。

十五萬人同一慟。

維園燭火星河湧。

二、

歌管喧闐揮舞袖。

赤馬紅羊，滄海揚塵又。

誰與班荊同擊缶。

離亭再折瀟瀟柳。

難道天公箝恨口？

時日偕亡，及汝歸烏有。

為政幾希聞在宥。

感嗟萬物皆裼狗。

三、

六曲屏山傍臥榻。

鳥語間關，隔牖輕相答。

曲折中流舟過峽。

蒼松偃岸生鱗甲。

萬事嘗騰歸一霎。

懊惱情懷，午夢來紛遶。

天地側身驚逼匝。

瘞愁當荷劉伶鍤。

四、

遲暮渡頭來艤舸。

跣足和衣，倚石閑欹臥。

偶問此生誰是我。

仰觀億萬星星顆。

中夜錚然秋葉墮。

寥落雲房，一穗青燈灺。

枯坐難成羅漢果。

起身微笑拈花朵。

五、

老樹昏鴉三數點。

酒旆搖晴，坐飲村醪醖。

永晝草堂涼竹簟。

博山深炷香無焰。

白日攜雲沉暮崦。

墟里炊煙，暝色溪橋店。

湖水微波生紫芡。

月明前路西風漸。

六、

鴻去燕來春苒苒。

嚴柝宮城，不緩金吾禁。

盡日瑣窗垂繡錦。

麥秋風雨殘寒凜。

深院梧桐生綠蔭。

竹簟冰壺，蘊藉肝脾沁。

向晚未聞鴉雀喑。

北軒穩夢邯鄲枕。

七、

四面屏山圍碧嶂。

修竹吾廬，兀立浮雲上。

好趁清溪桃汛漲。

輕搖欸乃蘭艘槳。

霽雨斜陽纔一餉。

睥睨千秋，人我俱相忘。

飛夢九霄馳妙想。

昆侖玄圃憑孤往。

八、

戈甲銜枚騰萬馬。

斗轉參橫，碧漢金商瀉。

如此江山沉寂夜。

卻思簫鼓粉榆社。

芒角明星垂大野。

何處笳聲，幽咽穹廬下。

玉闕高寒憐月姐。

千秋長望無來者。

九、

潮水平江來晚汛。

躡踵褰裳，薄暮登千仞。

呵壁捫心何所問。

砉然大野長星殞。

乙太風高生月暈。

陵穀浮沉，福禍誰能分。

碧海揚舲思遠遁。

生涯離垢方無悶。

摸魚兒 登紐芬蘭 St. John's 城 Signal Hill 賦感

俯萬家、港灣燈火，重重鱗櫛郭宇。

往來寂寞惟鷗鷺，海色蒼茫荒嶼。
憑四顧。迴莽蕩、山形盤踞如龍虎。
撫膺無語。
算朔北賓鴻，天涯逐客，溟漠同羈旅。

思疇昔、冰窟鯨鯢飛渡。
連雲羅剎檣櫓。
倚天屹立餘孤塔，閱盡英雄割據。
君莫舞。君不見、縱橫朝暮風和雨。
汰淘今古。
只新月平沙，斜陽峻岸，晚濤聲如故。

金縷曲 辛卯初秋 Vermont 紀游五章

一、

山居隨想

五柳環廬舍。
正晨曦、嵐煙掩映，青山如畫。
避地門前無車馬，幽徑盤穿石罅。

有瀟灑、扶筇來者。

橫笛臨風三弄曲，最思量、殘月梅花夜。

問誰是，桓子野。

悠然抱膝南窗下。

眄庭柯、鳩催時雨，簾纖飄瓦。

一壑停雲容傲嘯，彷彿當年汐社。

座上客、許由流亞。

竹榻清涼茶鐺沸，倚新詞、且把烏絲寫。

聽泉響，任冬夏。

二、

明德小鎮印像

百里華胥邑。

算而今、幾番來去，行雲蹤跡。

重到清溪曾遊地，數盡賓鴻過翼。

耿無語、徘徊遙夕。

蒼靄憑空恍瀕洞，下驚濤、萬馬馳磐石。

滄浪水，滌吾臆。

雨煙草樹凝寒碧。

挈黃童、踏歌謳晚，斜陽墟集。

見說河清逢瑞世，擊壤嘲嗤帝利。

看接軫、離離禾麥。

竹舍茅籬聞雞犬，訪尋常、五柳先生宅。

持吾耳，聽風笛。

三、

弗金斯（Vergennes）懷感

橋下驚湍吼。

遶邦城、溪流西去，山形南走。

濠上彩衣期頤者，鼓腹烏烏擊缶。

唏何世、河清人壽。

古縣停車曾遊處，見青青、澤畔多情柳。

猶記識，白雲叟。

持杯難忘從前酒。

試零星、拾回佳句，酬吟詩友。

寄語熙攘塵土客，莫負桑麻壟畝。

應到了、歸來時候。

欲泛扁舟盟鷗鷺，攬一江、風月皆吾有。

吾雖老，吾何陋。

四、

皇冠角（Crown Point）懷古

徙倚曾遊地。

又逢迎、扁舟鷗鷺，洲蘆汀芷。

慣客殊方應難讀，天際橫斜雁字。

且細把、鄉愁重理。

彼岸繁燈高樓宇，漸西風、暮靄浮金紫。

誰能會，登臨意。

湖山寂寞餘荒壘。

想當年、硝煙交織，曳塗肝肺。

通道春秋無義戰，蠻觸紛爭乃爾。

映落日、招搖旌幟。

往返渡輪鳴號角，感滄桑、一夢嘗騰起。

尚未熟，黃梁米。

五、

田園感遇

韶光隨飛羽。

又西風、流波激蕩，湖山初曙。

檢點扁舟十年事，浮海遁居感遇。

杳魚雁、誰傳心素。

遙望田疇連阡陌，豈期然、傾蓋新如故。

訪隱者，杏花塢。

鳥聲相和南園樹。

撫村醪、臨窗顧眄，濛濛時雨。

搔首東軒思契闊，千古停雲一賦。

君莫道、桃源無渡。

濯足濯纓滄浪水，向世間、再覓避秦路。

清淨處，即樂土。